

四庫全書

史部

欽定四庫全書

史部

宋史卷一百

七十一至  
七十二

詳校官編修臣周瓊

洗馬臣王坦修覆勘

覆校官編修臣沈清藻

校對官中書臣孫希旦

謄錄貢生臣陳廷鑑

欽定四庫全書

宋史卷一百七十

元中書右丞相總裁托克托等修

職官志第一百二十三

職官十

雜制

贊引

導從

賜

食邑

實封

使職

宮觀

贈官

叙封

致仕

蔭補

贊引

舊中書門下翰林學士御史中丞並緋衣雙引仍傳呼

開寶中學士止令一吏前導亦罷傳呼唯謝恩初上日雙引傳呼云

使相僕射兩省五品

已上一吏前引

樞密使兼相者二吏不贊引大中祥符五年止令於本廳贊引不帶相入副使

止令本院紫衣吏前贊引之

淳化四年令東宮三少尚書丞郎入朝

以緋衣吏前導並通官呵止二品已上用朝堂驅使官餘用本司驅使官宰臣親王仍令紫衣二吏引馬

導從

中書樞密宣徽院御史臺開封府金吾司皆有常從景德三年詔諸行尚書文明殿學士資政殿大學士給從

七人學士承節六人給事諫議舍人五人諸司三品四

人於開封府金吾司差借每季代之中書先差金吾從

人自今亦令參用開封府散從官宰臣參知政事僕射

御史大夫中丞知雜皆通官呵止行人

淳化四年令東宮三少尚書丞

郎並通官呵止

大中祥符五年以羣官導從不合品式命翰林

學士李宗諤龍圖直學士陳彭年與禮官詳定宗諤等

請自今除中書樞密宣徽使御史中丞知雜御史金吾

并攝事清道如舊制呵導外僕射已上及三司使知開

封府止四節尚書文明殿學士資政殿大學士三節丞  
郎已上三司副使兩節大兩省卿監一節小兩制御史  
郎中負外諸司四品三司開封府判官推官二人前行  
引不得過五步合於金吾借從人者以諸軍剩負代之  
又外任節制知州都監從軍士七十人通判十五人防  
團事知州都監五十人通判十人

河北河東陝西見泊  
兵處節鎮知州都監

百人防團軍事知  
州都監七十人

轉運使三十人

咸平二年詔節度觀  
察防團刺史或別鎮

他鎮其給使者止令本使給之景德六  
年令牧守以州兵隨行者以一年為限

副使二十五人

提點刑獄官亦給軍士副留守節度行軍副使留守兩使判官給散從官十五人小尹掌書記支使防禦團練副使兩使推官十人兩浙推官防團軍事判官推官軍監判官七人錄事諸曹給承符人縣令簿尉手力弓手其代還者給人護送有差

賜六

劍履上殿

詔書不名

贊拜不名

入朝不趨

紫金魚袋

緋魚袋

右升朝官談恩着綠二十周年賜緋魚袋着緋及

二十周年賜紫金魚袋

特旨者係臨時指揮

食邑

一萬戶 八千戶 七千戶 六千戶

五千戶 四千戶 三千戶 二千戶

一千戶 七百戶 五百戶 四百戶

三百戶 二百戶

右宰相親王樞密使經恩加一千戶兩府使相節

度使七百戶宣徽三司使觀文殿大學士以下至  
直學士文臣侍郎武臣觀察使宗室正任以上皇  
子上將軍駙馬都尉加五百戶宗室大將軍以上  
加四百戶知制誥待制并文臣少卿監武臣諸司  
副使宗室副率以上并承制崇班軍貲等初該恩  
加三百戶承制崇班軍貲再該恩二百戶二千戶  
以上雖有加例緣無定法親王重臣特加有至萬  
戶者

食實封

一千戶

八百戶

五百戶

四百戶

三百戶

二百戶

一百戶

右宰臣親王樞密使經恩加四百戶兩府使相節度宣徽使皇子上將軍并宗室駙馬都尉任觀察使已上加三百戶觀文殿學士并宗室正任已上騎都尉加二百戶武臣崇班宗室副率已上加一百戶五百戶已上雖有加例緣無定法親王重臣

有特加至數千戶者

三朝志云檢校兼試官之制檢校則三師三公僕射尚書散騎常侍賓客祭酒卿監諸行郎中員外郎之類兼官則御史大夫中丞侍御殿中監察御史試秩則大理司直評事祕書省校書郎凡武官內職軍職及刺史已上皆有檢校官兼官內殿崇班初授檢校祭酒兼御史大夫三班及吏職蕃官諸軍副都頭加恩初授檢校太子賓客兼監察御史自此累加焉

前軍都指揮使止於司徒軍都指揮使忠

佐馬步都頭止於司空親軍都雲候忠佐副都頭以上止於僕射諸軍指揮使止於吏部尚書其官止若遇恩

例則或加階爵功臣

幕職初授則試校書郎再任如至兩使推官

則試大理評事掌書記支使防禦團練判官已上試大理司直評事又加則兼監察御史亦有至檢校員外郎已上者行軍副使皆檢校員外已上朝官階勲高遇恩亦有加檢校官郎中則卿監少監員外郎則郎中太常博士已下則員外郎並無兼官其解褐評事校書郎正字寺監主簿助教者謂之試銜有選集同出身例

使職兼領者親祀南郊則有大禮禮儀儀仗鹵簿橋道

頓遞五使籍田泰山封禪汾陰奉祀恭上寶冊南郊恭

謝皆如之自餘行禮或止有大禮禮儀使建隆中南郊置儀仗都部

署副都署經始大禮則有經度制置使副巡幸有行宮都部

署行宮有三司使副使判官行宮使都監舊南郊止有御營使咸平

中置行宮使又有車駕前後行宮四面闕前收後郊壇巡檢

巡闕儀仗勾當編排鹵簿其百司皆有行在之名舊巡幸百

司皆稱隨駕大中祥符初並同行在某司京師居留則有大內都部署皇城

都點檢巡檢及增新舊巡檢

大閱亦置

征行則有招討使招

安使

或云捉賊招安安撫使名者

排陣使都監前軍先鋒大陣行營

壕砦頭車洞子招收部署鈐轄都監策應之名

又有招子馬無

地名馬選武幹者別領之

親征則冠以駕前之號廉訪民瘼則有巡

撫大使副大使安撫使副使都監採訪使副使

或官卑者止云

巡撫安撫無使字

加禮外國則有國信接伴送伴使副吊祭大

師若是又有翻譯經潤文使

宰相為使以翰林學士為潤文官

伸達冤

濫則有理檢使勸課農桑則有勸農使講脩馬政則有

羣牧制置使最後明堂祫饗置五使如南郊其一時特  
置者則各具志傳或臨事更制者事畢即停内外名務  
繁細者猶不具載

叙階之法開府儀同三司至將仕郎為文散官驃騎大

將軍至陪戎副尉為武散官

太平興國元年改正議大夫為正奉通議大夫為朝

奉朝議郎為朝奉承議郎為承直奉議郎為奉直宣議郎為通直

京朝官幕職自將仕

郎至朝奉郎每加五階至朝散大夫已上每加一階朝  
散銀青者須已服緋紫者入令錄判司簿尉每加一階

并募職計考當服緋紫者皆奏加朝散銀青階諸司使

已上如使額高者加金紫階內殿崇班初授則銀青階

三班軍職使職遇恩檢校兼官並除銀青階

丁憂者起復使相則授雲麾將

軍

使相仍加金吾上將軍同正節度使大將軍同正留後以下無之

其胥吏掌事而至

衣緋者則授游擊將軍千牛備身則授陪戎副尉已上

改賜功臣勲官自上柱國至武騎尉五代以來初叙勲

官即授柱國淳化元年詔自今京官幕職州縣官始武

騎尉朝官始騎都尉三班及軍貲吏職經恩並授武騎

尉又詔古之勲爵悉有職奉之陰贖宜以今之所授與散官等不得用以陰勲封爵之差唐制王食邑五千戶郡王國公三千戶開國郡公二千戶縣公千五百戶縣侯千戶伯七百戶子五百戶男三百戶又有食實封者戶給纁帛每賜爵遞加一級唐末及五代始有加邑特戶而罷去實封之給又去縣公之名封侯以郡宋初沿其制文臣少監少卿以上武臣副率以上內職崇班以上有封爵丞郎學士刺史大將軍諸司使以上有實封

但以增戶數為差不係爵級邑過其爵則并進爵焉止

於郡公每加食邑自千戶至二百戶實封自六百戶至

百戶親王重臣或特加有踰千戶者

郡公食邑有累加至萬餘實封至數

千戶皇屬特封郡公縣公或贈侯者無開國字

侯亦在開國郡

公之

又采秦制賜爵曰公士

端拱二年賜諸州高年一百二十七人爵公士景德

中福建民有擒獲強盜者當授鎮將以速俗非所樂並賜公士自後率為例

功臣者唐開元

間賜號開元功臣代宗時有寶應功臣德宗時有奉天

定難元從功臣之號僖宗將相多加功臣美名五代寢

增其制宋初因之凡宣制而授者多賜焉參知政事樞密副使刺史以上階勲高者亦賜之中書樞密則推忠協謀親王則崇仁佐運餘官則推誠保德翊戴掌兵則忠果雄勇宣力外臣則純誠順化宰相初加即六字餘並四字其累加則二字中書樞密所賜若罷免或出鎮則改之其諸班直將士禁軍則賜拱衛翊衛等號遇恩累加但改其名不過兩字

宮觀

宋制設祠祿之官以供老優賢先時負數絕少熙寧以後乃增置焉在京宮觀舊制以宰相執政充使或丞郎學士以上充副使兩省或五品以上為判官內侍官或諸司使副

政和改武臣官制以使為大夫以副使為郎

為都監又有提舉提

點主管其戚里近屬及前宰執留京師者多除宮觀以示優禮時朝廷方經理時政患疲老不任事者廢職欲悉罷之乃使任宮觀以食其祿王安石亦欲以此處異議者遂詔宮觀母限負並差知州資序人以三十月為

任又詔杭州洞霄宮亳州明道宮華州雲臺觀建州武夷觀台州崇道觀成都玉局觀建昌軍仙都觀江州太平觀洪州玉隆觀五嶽廟自今並依嵩山崇福宮舒州靈仙觀置管幹或提舉提點官奉給大兩省卿監及職司資序人視小郡知州知州資序人視小郡通判武臣倣此四年詔宮觀嶽廟留官一員餘聽如分司致仕例從便居住六年詔卿監職司以上提舉餘官管幹又有以京官為幹當者又詔年六十以上者乃聽差毋過兩

任又詔兼用執政恩例者通不得過三任元豐中王安石以右僕射觀文殿大學士為集禧觀使呂公著韓維以資政殿學士兼侍讀仍提舉中太一宮兼集禧觀公事元祐間馮京以觀文殿學士梁燾以資政殿學士為中太一宮醴泉觀使范鎮落致仕以端明殿學士提舉中太一宮兼集禧觀公事三年詔橫行使副無兼領者許兼宮觀一處六年詔橫行狄詒宋球既領皇城司罷提點醴泉觀元符元年高遵固年八十一乞再任宮觀

高遵禮年七十六乞再任亳州太清宮又從其再任之請以待遇宣仁親屬故也大觀元年趙挺之以觀文殿大學士為祐神觀使政和六年詔措置宮觀如萬壽醴泉近百貧更不立額靖康元年詔内外官見帶提舉主管神霄玉清萬壽宮並罷大抵祠館之設均為佚老優賢而有内外之別京祠以前宰相見任使相克使次克提舉餘則為提點為主管皆隨官之高下處以外祠選人為監獄廟非自陳而朝廷特差者如黜降之例紹興

以來士大夫多流離困厄之餘未有闕以處之於是許以承務郎以上權差宮觀一次續又有選人在部無闕可入與破格獄廟者亦有以宰執恩例陳乞而與之者

月破供給

非責降官並月破供給依資序降二等支

理為資任意至厚也然

初將以撫安不調之人未乃重僥求泛與之弊於是臣僚交章欲罷供給以絕干請變理任以抑僥倖嚴按格以去泛濫上並從之自是以後稍復祖宗條法之舊又有年及七十耄昏不堪牧養而不肯自陳宮觀者復申

明舊法著為定令以律之

舊制六十已上知州資序人本部長官體量精神不致昏

昧堪塵務者許差一任兼用執政官陳乞者加一任紹興二十二年臣僚言郡守之職其任至重昨朝廷以年及七十令吏部與自陳宮觀乞將前項指揮永為著令從之

蓋不當請而請則冗瑣

者流競竊優閑廩稍或當請而不請則知進而不知退識者羞焉一祠館之與奪不可不謹如是故重內祠專

使職所以崇大臣之體貌一次以定法再任以示恩

紹熙

五年慶壽赦應文武臣宮觀獄廟已滿不應再陳者該今來慶壽恩年八十已上特許更陳一次

京官

以上二年選人三年凡待庶僚者皆於優厚之中寓閑

制之意焉

贈官

建隆已來凡有恩例文武朝官諸司使副禁軍及蕃方馬步都指揮使以上父亡皆贈官親王贈三官可贈者贈二官追加大國皇屬近親如之追加封爵服疎及諸親之服近者贈一官宰相樞密使贈一官使相參知政事樞密副使尚書已上三司使節度使留後觀察使統軍上將軍內臣任都知副都知者贈一官此皇族及臣

僚薨卒贈官之法也其官秩未至而因勲舊褒錄或沒  
王事雖卑秩皆贈官加等者並係臨時取旨至於母后  
后族臣僚錄其先世各有等差太皇太后皇太后皇后  
並贈三世婕妤二世貴人止贈其父而已宰相三師三  
公王尚書令中書令侍中樞密使副知院同知院事參  
知政事宣徽使簽書同簽書樞密院事觀文殿大學士  
節度使並贈三世東宮三師僕射留守節度使三司使  
觀文殿學士資政殿大學士並贈二世餘官或見任或

致仕並贈一世有兄弟同贈者贈官加一等父在止一  
資文臣有出身贈至祕書監無出身至光祿卿武臣至  
金吾衛上將軍止凡贈官至三世者初贈東宮三少次  
東宮三太次三公次中書令次尚書令次封小國自小  
國升次國自次國升大國已大國者移國名而已

亦有不移

者若祖父舊官已高者自從舊官加贈凡追封不得至  
王爵兩省官及待制大卿監諸衛上將軍觀察使正任  
防禦使遙郡觀察使景福殿使客省使若子見任或父

曾任此官並贈至三公止父子官俱不至者文臣贈至  
諸行尚書止武臣贈至節度使諸衛上將軍止若父曾  
任中書樞密使使相節度使并一品官者無止限待制  
已上持服經恩服闋亦許封贈尚藥奉御至醫官使曾  
任文資許換南班官司天監官贈不得過大卿監仍不  
許任南班官凡贈至正郎許以所贈官換朝散大夫階  
大卿監以上許換銀青階贈至二世者即除朝散大夫

階三世則金紫階

咸平四年詔舍人院詳定知制誥李宗諤等請追贈三世如舊其東宮一

品以下雖曾任宰相止從本品文武羣臣功隆位極者特恩追封王爵亦如舊若因子孫封贈雖任將相並不許封王仍雖歷品而贈勿得超越從之宰相初拜有即贈三世者其後簽書樞密以上皆即時贈他官須經恩學士及刺史以上內侍都知押班皆中書奉行餘則有司奏請

## 叙封

唐制視本官階爵建隆三年詔定文武羣臣母妻封號  
太皇太后皇太后皇后曾祖母祖母並封國太夫人  
諸妃曾祖母祖母並封郡太夫人婕妤祖母母並封  
郡太君貴人母封縣太君宰相使相三師三公王侍中

中書令

舊有尚書令

曾祖母祖母母封國太夫人妻國夫人

樞密使副知院同知參知政事宣徽節度使曾祖母祖母封郡太夫人妻郡夫人簽書樞密院事曾祖母祖母封郡太君妻郡君同知樞密院以上至樞密使參知政事再經恩及再除者曾祖母祖母母加國太夫人三司使祖母母封郡太君妻郡君東宮三太文武二品御史大夫六尚書兩省侍郎太常卿留守節度使諸衛上將軍嗣王郡王國公郡公縣公母郡太夫人妻郡夫

人常侍賓客中丞左右丞侍郎翰林學士至龍圖閣直  
學士給事中諫議大夫中書舍人卿監祭酒詹事諸王  
傅大將軍都督中都護副都護觀察留後觀察使防禦  
使團練使並母郡太君妻郡君庶子少卿監司業郎中  
京府少尹赤縣令少詹事諭德將軍刺史下都督下都  
護家令率更令僕母封縣太君妻縣君其餘升朝官已  
上遇恩並母封縣太君妻縣君雜五品官至三任與叙  
封官當叙封者不復論階爵致仕同見任亡母及亡祖

母當封者並如之父亡無嫡繼母聽封所生母伎術官不得叙封自宰相及簽書樞密院叙封與三世同他官

惟品至者即時擬封餘皆俟恩乃封咸平四年從舍人

院詳定羣臣母妻所封郡縣依本姓望封

天禧元年令文武升朝官

無嫡母者聽封生母曾任升朝而致仕即許叙封令給諫舍人母並封郡太君妻郡君四年又令翰林學士至

龍圖閣直學士如給舍例

封贈之典舊制有三代二代之等因

其官之高下而次第焉凡初除及每遇大禮封贈三代者太師太傅太保左右丞相少師少傅少保樞密使開

府儀同三司知樞密院事參知政事同知樞密院事樞密副使簽書樞密院事凡遇大禮封贈三代者節度使

三代初封曾祖朝散郎父朝請郎

簽書樞密院事降一等謂如父與朝散郎

之類凡封父祖係武臣者視文武臣封贈對換格封贈一

代亦如之初贈曾祖太子少保祖太子少傅父太子少

師封贈曾祖母祖母妻國夫人

執政官簽書樞密院事郡夫人凡遇

大禮封贈二代者太子太師太子太傅太子太保特進

觀文殿太學士太子少師太子少傅太子少保御史大

夫觀文殿學士資政保和殿大學士金紫光祿大夫銀  
青光祿大夫光祿大夫左右金吾衛上將軍左右衛上  
將軍二代初封祖通直郎父奉議郎初贈祖朝奉郎父  
朝散郎封贈祖母母妻郡夫人觀文殿學士資政保和殿大學士並淑人凡  
遇大禮封贈一代者文臣通直郎以上武臣脩武郎以  
上一代初封贈父文臣承事郎武臣內侍伎術官將校  
並忠訓郎母妻孺人

凡文臣贈官

通直郎以上

寺監官以上未升朝者  
雜壁在通直郎之上同

每贈兩官至奉直

大夫一官

有出身不贈奉直  
大夫中散大夫

太子太師太子太傅太子

太保持進觀文殿太學士太子少師太子少傅太子少

保御史大夫觀文殿學士資政保和殿大學士六曹尚

書金紫光祿大夫銀青光祿大夫光祿大夫翰林學士

承旨翰林學士資政保和端明殿學士龍圖天章寶文

顯謨徽猷敷文閣學士左右散騎常侍權六曹尚書御

史中丞開府尹六曹侍郎樞密直學士龍圖天章寶文

顯謨徽猷敷文閣直學士每贈三官至奉直大夫二官

至通議大夫一官

有出身人不贈奉直中散大夫

凡文武臣封贈對換

諸文武臣封贈對換以所加官準格對換並聽從高

承事郎換忠訓郎宣義郎換從義兼節郎宣教郎換訓

武脩武郎通直郎換武義武翼郎奉義郎換武節武略

武經郎承議郎換武功武德武顯郎朝奉郎換武義武

翼大夫朝散郎換武節武略武經大夫朝請郎換武功

武德武顯大夫朝奉大夫換遙郡刺史朝散大夫換遙

卷一百七十  
郡團練使朝請大夫換遥郡防禦使奉直朝議大夫換  
刺史中散中奉大夫換團練使中大夫換防禦使太中  
大夫通議通奉大夫換觀察使正議正奉宣奉大夫換  
承宣使光祿大夫銀青金紫光祿大夫換節度使

凡文武官父任承直郎以下贈官

承直郎留守節察判官留守府判官節度判官承議郎  
儒林郎支掌防團判官節度掌書記觀察支使防禦判  
官團練判官奉議郎文林郎從事郎從政郎兩使初等

職官令錄留守推官觀察推官軍事判官軍事推官司  
錄參軍錄事參軍團練推官軍監判官防禦判官縣令  
通直郎脩職郎知令錄知司錄參軍知錄事參軍縣丞  
宣教郎迪功郎判司簿尉軍巡判官司理參軍司法參  
軍司戶參軍主簿縣尉宣義郎

致仕

凡文武朝官內職引年辭疾者多增秩從其請或加恩  
其子孫乾德元年太子太師致仕侯益來預郊祀太祖

優待之因詔曰羣臣列位自有通規舊德來朝所宜加禮且表優賢之意用敦尚齒之風自今一品致仕官曾帶平章事者每遇朝會宜綴中書門下班二年令藩鎮帶平章事求休致者亦如之咸平五年詔文武官年七十一以上求退者許致仕因疾及有贓犯者聽從使牧伯內職三班皆換環衛幕職州縣外官景德元年三月詔三班使臣七十以上視聽未衰者與釐務其老昧不任及年七十五以上者借職授支郡上佐奉職殿直授

節鎮上佐不願者聽歸鄉里凡升朝官遇慶恩父在者授致仕官其不在者文官始大理評事武官始副率再經恩累加焉祖在而求回授者亦聽皆不給奉亦有子居要近加賜章服者天聖明道間貧外郎已上致仕者錄其子試祕書省校書郎三丞已上為太廟齋郎無子聽降等官其嫡孫若弟侄一景祐三年詔曰致仕官舊皆給半奉而未嘗為顯官者或貧不能自給豈所以遇高年養廉恥也其大兩省太卿監正刺史閤門使已上

致仕者自今給奉並如分司官例仍歲時賜羊酒米麪  
令所在長吏常加存問其後又許致仕官子孫免選除  
近官四年臣僚有請致仕未及錄其子孫而遽亡者命  
既出輔臣皆謂法官追收仁宗憫之竟官其後侍御史  
知雜事司馬池言文武官年七十以上不自請致仕者  
許御史臺糾劾以聞慶曆中權御史中丞賈昌朝又言  
臣僚年七十而筋力衰者並優與改官致仕雖七十而  
未衰及別有功狀朝廷固留任使者勿拘此令在京若

尚書工部侍郎俞獻卿少府監畢世長太常少卿李孝  
若尚書駕部郎中李士良在外若給事中盛京光祿卿  
王盤太常少卿張倣尚書兵部郎中張億皆耄昏不可  
任事並請除致仕詔在京者令中書體量在外者下諸  
處曉諭之皇祐中知諫院包拯吳奎亦言願令御史臺  
監察年七十已上移文趨其請老不即自陳者直除致  
仕朝廷未行奎復言國家謹禮法以維君子明威罰以  
御小人君子所顧者禮法也小人所畏者威罰也繇文

武二選為士大夫是皆君子之地也儻不以禮法待之  
則是廢名器而輕爵祿七十致仕學者所知而臣下引  
年自陳分之常也人君好賢樂善而留之仁之至也自  
三代以來用此以塞貪墨蔽廉隅近者句希仲陸軫等  
皆以年高特與分司初欲風動羣臣而在位殊未有引  
去者是臣言未效也詳請前奏施行於是詔少卿監以  
下年七十不任釐務者外任令監司在京委御史臺及  
所屬以狀聞嘗任館閣臺諫官及提點刑獄者令中書

裁處待制已上能自引年則優加恩禮然是時言事之人競欲擊劾大臣有高年者俱不自安仁宗手詔曰老臣朕之所眷禮也進退體貌恩意豈不有異哉凡嘗預政事之臣自今毋或遽求引去臺諫官勿以為言其風動勸勵之方又如此至於因事責降分司或老病不任官職之事或居官犯法或以不治為所部劾奏衝替而求致仕者子孫更不推恩雖或推恩其除官例皆降等若耆老舊臣體貌優異賞或延于子孫奉或全給半給

歲時問勞皆有禮意治平四年神宗即位龍圖閣直學  
士兼侍讀李東之李受相繼致仕舊制閣門無謝辭例  
帝特召東之對延和殿命坐賜茶以受先朝藩府舊僚  
升其子一任差遣并錄其孫皆宴餞資善堂命講讀官  
賦詩御製詩序以寵其行示異數也是歲又以果州團  
練使何誠用惠州防禦使馮承用嘉州團練使劉保吉  
昭州刺史鄧保壽皆年七十以上至八十餘並特令致  
仕以樞密院言致仕雖有著令臣僚鮮能自陳故也熙

寧元年以定國軍節度使李端願為太子少保致仕故事多除上將軍帝令討闕唐制優加是命二年以觀文殿學士吏部尚書趙槩為太子少師致仕故事再請則許槩三乞始從優耆舊也三年編脩中書條例所言人臣非有罪惡致仕而去人君遇之如在位時禮也近世致仕並與轉官蓋以昧利者多知退者少欲加優恩以示勸獎推行既久姑從舊制若兩省正言以上官三班使臣大使臣橫行正任等並不除為致仕官致仕帶職

者皆落職而後優遷其官看詳別無義理但致仕恩例不均如諫議大夫不可改給事中並轉工部侍郎乃是超轉兩資工部尚書並除太子少保乃是超轉六資若知制誥待制官卑者除卿監緣知制誥待制待遇非與卿監比今他官致仕皆得遷官此獨因致仕更見退抑供奉官侍禁八品除率府副率蓋六品諸司副使承制崇班七品除將軍乃三品至於節度使除上將軍防禦團練刺史並除大將軍緣諸衛名額不一至有刺史除

官高於防禦使者今若令文武官帶職致仕人許仍舊  
職止轉一官及文臣正言武臣借職以上皆得除為致  
仕官則無輕重不等之患若選人令錄以上並除朝官  
經恩皆得封贈蔭及四世旁支例得贖罪免役又京官  
致仕亦止遷一官若光祿寺丞致仕有出身除祕書省  
著作佐郎無出身除大理寺丞而令錄職官乃除太子  
中允或中舍殊未為當若進納出身人例除京官至有  
經單恩遷至升朝官者類多兼并有力之家皆免州縣

色役及封贈父母如京官七品除衙前外亦免餘色役  
尤為僥倖條例繁雜無所適從如錄事參軍或除衛尉  
寺丞或除大理評事或除奉禮郎恩例不同可以因緣  
生弊今定凡文臣京朝官以上各轉一官帶職仍舊不  
轉官乞親屬恩澤者依舊條選人依本資序轉合入京  
朝官進納及流外人判司簿尉除司馬令錄除別駕在  
京諸司勒留官依簿尉以上親賢勞舊合別推恩者取  
旨歷任有入已賊不得乞親戚恩澤仍不遷官其致仕

官除中書樞密院外並在見任官之上致仕及三年之上元非因過犯年未及七十不曾經叙封及陳乞親戚恩澤却願仕宦並許進狀叙述若有薦舉者各依元資序授官其才行為衆所知朝廷特任使者不拘此法從之自此宰相以下並帶職致仕四年以端明殿學士尚書右丞王素為工部尚書端明殿學士致仕觀文殿學士兵部尚書歐陽修為太子少師觀文殿學士致仕帶職致仕自素始也五年守司空兼侍中曾公亮遷守太

傳致仕特許入謝以公亮逮事三朝既加優禮仍給見任支賜十月詔兩省以上致仕官毋得因大禮用子升朝叙封遷官先是王安石言李端愿李東之叙封中書失檢舊例法當改正帝曰如此則獨不被恩安石曰叙封初無義理今既未能遽革庸可承誤為例如三師三公官因子孫郊恩叙授尤非宜也帝從之元豐三年詔自今致仕官遇誕節及大禮許綴舊班以禮部侍郎范鎮居都城外遇同天節乞隨散官班上壽帝令鎮班見

任翰林學士上故有是詔又詔致仕官朝失儀勿劾並著為令又詔自今致仕官領職事者許帶致仕該遷轉者轉寄祿官若止係寄祿官即以本官致仕其見任致仕官除三師三公東宮三師三少外餘並易之六年以守太尉開府儀同三司知河南府文彥博為河東永興節度使守太師致仕彥博辭兩鎮止以河東舊鎮貼麻行下彥博又言前辭闕下之日嘗奏得致仕後當親辭天陛今既得請欲赴闕廷降詔從之七年詔文臣中大

夫武臣諸司使以下致仕更不加恩元祐元年樞密院  
奏諸軍年七十若以疾假滿百日不堪醫治差使者諸  
廂都指揮使除諸衛大將軍致仕諸軍都指揮使諸班  
直都虞候帶遙郡除諸衛將軍致仕諸班直上四軍除  
屯衛拱聖以下除領軍衛並有功勞者為左無則為右  
從之四年詔應乞致仕而不願轉官者受敕後所屬保  
明以聞當與推恩中大夫至朝奉郎及諸司使本宗有  
服親一人蔭補恩澤橫行諸司副使見有身自蔭補人

及內殿承制崇班閤門祗候見理親民并承議奉議郎  
許陳乞有服親一人恩例中大夫中散大夫諸司使帶  
遙郡者蔭補外准此即朝奉郎以上及諸司使雖未受  
敕而身亡在外者以乞致仕狀到門下省日在京以得  
旨日亦許陳乞有服親一人恩例六年監察御史徐君  
平言文臣致仕以年七十為斷而使臣年七十猶與近  
地監當至八十乃致仕願許其致仕之年如文臣法而  
給其奉從之三省言張方平元係宣徽南院使檢校太

傳太子少師致仕元豐官制行廢宣徽使元祐三年復置儀品恩數如舊制方平依舊帶宣徽南院使致仕紹聖三年詔文武官該轉官致仕依舊出告外其餘守本官致仕者並降敕更不給告內因致仕合該乞恩澤人更不具鈔令尚書省通書三司入熟狀仍不候印畫又詔應臣僚丁憂中不許陳乞致仕建中靖國元年尚書省言臣僚在憂制中不得陳乞致仕其間有官序合得致仕恩澤之人合行立法詔臣僚丁憂中遇疾病危篤

其官序合該致仕恩澤者聽以前官經所屬自陳大觀二年詔致仕官年八十以上應給奉者以緡錢充政和六年提舉廣東學事孫璘言諸州致仕官居鄉者乞許令赴貢士宴擇其年彌高者而惇事之使長幼有序獻酬有禮人知里選之法孝悌之義從之宣和四年詔六曹尚書致仕遺表恩澤共與四人其餘侍從官三人立為定制建炎間嘗詔文武官陳乞致仕朝廷不從致有亡身之人許依條陳乞致仕恩澤及陳乞致仕而道路

不通不會被受敕命亦許州軍保明推恩時強行父博學清脩不緣事故疾病慨然請老葉份言之許令再仕王次翁年未及六十浩然休退呂祉言之落致仕特令再仕凡類此者蓋因其材而挽留之也直祕閣致仕鄭南掛冠已久年德俱高大臣言之詔除祕閣脩撰仍舊致仕優其恩不奪其志也呂頤浩以少保乞除一寄祿官致仕詔除少傅依前鎮南軍節度使成國公致仕韓世忠以太傅鎮南武安寧國軍節度使充醴泉觀使咸

安郡王乞身詔除太師致仕因將相之知止而優其歸也楊惟忠邢煥皆以節度致仕臣僚言祖宗時節將臣僚得謝不以文武並納節除一官以今日不復納節換官為非詔今後依祖宗典故蓋不以私恩勝公法也昭慶軍節度使開府儀同三司充萬壽觀使韋淵乞守本官致仕詔免赴朝參仍依兩府例合破請給人從優親之恩而異之也隆興以後因臣僚言年七十不陳乞致仕者除合得致仕或遺表恩澤外並不許遇郊奏薦已

而復詔郊祀在近未致仕人更許陳乞奏薦一次可以  
不予而予之示厚恩也執政在謫籍者陳乞致仕雖許  
叙復而寢罷合得恩澤只據見存階官蔭補淳熙十六  
年寧武軍承宣使提舉佑神觀王友直復奉國軍節度  
使致仕臣僚論列仍守本官職致仕可以予而不予嚴  
公法也抑揚輕重間可以見優老恤賢之意可以識制  
情抑倖之術故備錄于篇

文臣蔭補

太師至開府儀同三司子承事郎孫及期親承奉郎大

功以下及異姓親登仕郎門客登仕郎

不理  
選限

知樞密

院事至同知樞密院事子承奉郎孫及期親承務郎大

功以下及異姓親登仕郎門客登仕郎

不理  
選限

太子太

師至保和殿大學士子承奉郎孫及期親承務郎大功

以下登仕郎異姓親將仕郎 太子少師至通奉大夫

子孫及期親承務郎大功親登仕郎異姓親登仕郎小

功以下親將仕郎 御史中丞至侍御史子承務郎孫

及期親登仕郎大功將仕郎小功以下及異姓親將仕郎  
郎 中大夫至中散大夫子通仕郎孫及期親登仕郎  
大功將仕郎小功以下將仕郎 太常卿至奉直大夫  
子登仕郎孫及期親將仕郎大功小功親將仕郎 國  
子祭酒至開封少尹子孫及小功以上將仕郎 朝請  
大夫帶職朝奉郎以上理職司資序及不帶職致仕者同 子將仕郎小  
功以下親將仕郎總麻上州文學注權官一任回注正官謂帶職朝奉郎以  
上亡沒應 廣南東西路轉運副使子登仕郎孫及期親  
蔭補者

將仕郎提點刑獄子將仕郎孫及期親將仕郎

武臣蔭補

樞密使開府儀同三司子秉義郎孫及期親忠翊郎大功以下親承節郎異姓親承信郎 知樞密院事同知樞密院事樞密副使太尉節度使子忠訓郎孫及期親成忠郎大功承節郎小功以下及異姓親承信郎 諸衛上將軍承宣使觀察使通侍大夫子成忠郎孫及期親保義郎大功以下承信郎及異姓親承信郎 樞密

都承旨正侍大夫至右武大夫防禦使團練使延福宮  
使至招宣使任入內內侍省都知以上子保義郎孫及  
期親承節郎大功以下親內各奏異姓親者同承信郎刺史子  
承節郎孫及期親承信郎大功以下進武校尉諸衛  
大將軍武功至武翼大夫樞密承旨至諸房副承旨子  
承節郎孫及期親承信郎大功以下進武校尉諸衛  
將軍正侍至右武郎武功至武翼郎子承信郎孫進武  
校尉期親進義校尉樞密院逐房副承旨子承信郎

訓武脩武郎及閤門祗候子進義校尉 忠佐帶遙  
郡者每兩遇大禮蔭補子刺史進武校尉團練使防禦  
使承信郎

臣僚大禮蔭補

宰相執政官本宗異姓門客醫人各一人東宮三師三

少至諫議大夫

稽六曹侍郎  
侍御史同

本宗一人

寺長貳監長

貳祕書少監國子司業起居郎舍人中書門下省檢正

尚書省左右司郎官樞密院檢詳若六曹郎中殿中侍

御史左右司諫開封少尹子或孫一人

致仕蔭補

曾任宰相及見任三少使相三人曾任三少使相執政  
官見任節度使二人太中大夫及曾任尚書侍郎及右  
武大夫以上并曾任諫議大夫以上及侍御史一人

遺表蔭補

曾任宰相及見任三少使相五人曾任執政官見任節  
度使四人太中大夫以上一人諸衛上將軍承宣使四

人觀察使三人

次定回車全書

宋史

三

宋史卷一百七十

宋史卷一百七十考證

職官志十韓世忠以太傅鎮南武安寧國軍節度使充

醴泉觀使咸安郡王乞身詔除太師致仕○臣聞鼎

按通鑑紹興十一年世忠連疏乞罷為醴泉觀使封

福國公又紹興二十一年太傅鎮南武安寧國節度

使咸平王韓世忠卒則世忠醴泉觀使在罷後而本

文克於乞身之前且咸安郡王與通鑑福國公咸平

王皆參差

宋史卷一百七十考證

欽定四庫全書

宋史卷一百七十一

元中書右丞相總裁托克托等修

職官志第一百二十四

職官十一 奉祿制上

奉祿匹帛

職錢

祿粟

僚人衣糧

厨料

薪炭諸物

奉祿

自宰臣而下至岳瀆廟令凡四十一等

宰相樞密使月三百千

春冬服各綾二十匹  
絢三十匹冬綿百兩

樞密使帶

使相侍中樞密使

春冬衣同宰相

節度使同中書門下平章事

已上及帶宣徽使并前兩府除節度使及節度使移鎮

樞密使副知院帶節度使四百千參知政事樞密副使

知樞密院事同知樞密院事及宣徽使不帶節度使或

檢校太保簽書樞密院事三司使二百千

春冬各綾十匹春絹十匹

冬二十匹綿五十兩自宰相而下春各加羅一匹檢校太保簽書者春冬絹二十匹綿五十兩

節度觀

察留後知樞密院事及充樞密副使同知樞密院事并

帶宣徽使簽書樞密院事三百千

綾絹羅綿同參知政事

觀文殿

大學士

料錢衣賜  
隨本官

資政殿大學士

料錢衣賜  
隨本官

翰林學士

承旨學士龍圖天章閣直學士知制誥龍圖天章閣學

士

綾各五匹絹十七匹自承旨而下加羅一匹綿五十  
兩已上奉隨本官衣賜如本官例大即依本官例小

即依  
逐等

三師三公百二十千

綾各十匹  
絹二十匹

東宮三司僕射九

十千

綾各五匹  
絹二十匹

東宮三少御史大夫尚書六十千門下

中書侍郎太常宗正卿左右丞諸行侍郎御史中丞五

十千

春冬各綾五匹絹十七匹惟中丞綾七  
匹絹二十匹權御史中丞者給本官奉

太子賓客

四十五千

綾絹同  
中丞

左右散騎常侍六十千給事中中書

舍人太卿監國子祭酒太子詹事四十五千諫議四十

千春冬綾各三匹絹十五匹舊志太常宗正卿左右丞侍郎充翰林承旨及侍讀侍講各綾七匹絹二十匹

中書舍人若充翰林學士綾五匹絹十七匹他官充龍圖閣學士樞密直學士並準此龍圖閣學士知制誥同

諫議之數權三司使并權發遣使公事料錢衣賜並同本官副使五十

千春綾二匹冬綾五匹春冬絹各十五匹自三師以下春各加羅一匹冬綿五十兩權者同判官并權及發

遣以至子司主判河渠勾當公事同管左右諭德少卿

監司業郎中三十五千左右庶子起居郎舍人侍御史

知雜事同如正郎知左右司諫殿中侍御史負外郎赤

雜即支本官奉料

令三十千丞十五千

如京朝官願請本官衣奉者仍支米麥

少詹事二十

九千

春冬絹各十三匹惟赤縣令衣賜隨本官

左右正言監察御史太常博

士通事舍人國子五經博士太子宗正祕書殿中丞著

作郎大理正二十千太子率更令中允贊善中舍洗馬

殿中省五尚奉御十八千

太常博士以上春冬絹各十匹諭德以下春加羅一匹冬

綿三十兩餘各絹七匹太常博士著作洗馬舊各有增減司天十五千正十三千

春冬

絹各五匹各綿十五兩

祕書郎著作佐郎

春冬絹各六匹冬綿冬三十兩五官正以下春

羅各一匹祕書舊無奉兼三館職事者給八十千至道二年令同著作郎給之

大理寺丞十四

千諸寺監丞十二千

春冬綃各五匹

大理評事十千

春冬各綃三匹自大

理寺丞以下冬綿各加十五兩諸寺監丞大理評事舊有增損不同

太祝奉禮八千司天

監丞五千

春冬綃各五匹

主簿五千

春冬綃各三匹丞簿各綿十五兩

靈臺郎

三千保章正二千

春冬綃各三匹惟靈臺郎冬隨衣錢三千

節度使四百千

管軍同如皇子充節度使兼侍中帶諸王皇族節度使同中書門下平章事并散節度使及帶王爵奉同節度

使惟春冬加綃各百匹大綃各二十匹小綃各三十匹羅各十匹綿各五百兩

節度觀察留後

官制行改承宣使

三百千

管軍同兩省都知押班諸司使遙領者準此如皇族充留後及帶郡王同

惟春加綃二十匹冬三十匹大小綃各十匹春羅一匹冬綿百兩

觀察使二百千

管軍同兩

省都知押班諸司使并橫行遙領者奉準此春冬加綃  
各十匹綿五十兩如皇族充觀察者即三百千仍春冬  
加綃各十五匹綾十匹  
**防禦使三百千** 管軍皇族同其  
春羅一匹冬綿五十兩  
知押班諸司使并橫行諸衛大將軍將軍遙領者百五  
十千皇族春冬加綃各十五匹綾十匹春羅一匹綿五  
十兩兩省都知押班并橫行諸衛大  
**團練使百五十千**  
將軍領者春冬綃各十匹綿五十兩  
管軍及皇族并軍班除充者同其皇族及兩省都知押  
班諸司使并橫行諸衛大將軍遙領者百千皇族春冬  
加綃各十五匹綾十匹春羅一匹綿五十兩兩省都知  
押班并橫行諸衛大將軍將軍領者春冬綃各十匹冬  
綿五  
**六軍統軍百千諸衛上將軍六十千** 春冬綾各五  
十兩  
五十兩如皇子充諸衛上將軍二百千春冬綾各  
十匹春綃十匹羅一匹冬綃二十匹綿五十兩  
**左右**

金吾衛大將軍三十五千諸衛大將軍二十五千

春冬綾各

三匹絹七匹冬綿二十兩

將軍二十千

春冬綾各二匹絹五匹綿二十兩

率府率副

中郎將十三千

春冬絹各五匹冬綿十五兩自諸衛上將軍以下春衣羅一匹

內客省

使六十千客省使三十七千延福宮景福殿宣慶引進

四方館宣政昭宣閣門使二十七千皇城以下諸司使

二十五千

春絹各十匹冬十匹綿三十兩惟客省使春冬絹各一十匹

客省及皇城

以下諸司副使二十千內殿承制十七千崇班十四千

春絹各五匹冬十匹綿三十兩帶閣門祇候並同

供奉官十千

帶閣門祇候者十二千春絹四

匹冬五匹  
侍禁七千  
帶閣門祇候者一十千  
殿直五千  
帶閣門祇候者九千

並春冬綃各四匹冬綿十五兩  
三班奉職借職四千  
春冬綃各三匹錢二千  
下茶

酒班殿侍一千  
春冬綃七匹冬綿十五兩  
下班殿侍七百  
春冬綃各五匹二項

並蕃官并土人補充者  
皇親任諸衛大將軍領刺史八千將軍刺

史六十千  
春冬綾十匹春綃十二匹冬十三匹綿五十兩舊志春冬綾十匹綃十五匹各加羅一匹

將軍三十千  
春冬綾三匹綃五匹羅一匹冬綿四十兩  
率府率二十千副率

十五千  
春冬綾各二匹綃五匹羅一匹綿四十兩

舊志諸衛將軍有五十千四十千三十千三等  
一等春冬

各綾五匹絹十匹一等綾二匹絹五匹春並加羅一匹冬並綿二十兩

諸司使有四十

千三十千二等副使以上下與異姓同並給實錢自

司使至殿直春冬各羅一匹綾一匹絹各五匹冬綿各四十兩

入內內侍省都知副都知押班不帶遙郡諸司使充者

二十五千

春絹七匹冬十匹綿三十兩

副使充者二十千

春絹五匹冬七匹綿三十兩

二十

入內內侍省供奉官十二千

春絹五匹冬七匹綿三十兩

殿頭

七千高品高班五千

春絹各五匹冬六匹綿二十兩

黃門三千

春冬絹各五匹

綿十

祇候殿頭祇候高品祇候高班內品祇候內品祇

候小內品貼祇候內品入內內品後苑內品後苑散內

品七百

春冬綃各五匹綿十五兩

雲韶部內品七百

春冬綃各四匹綿十五兩

內內品管勾二千奉輦祇應一千五百打牧祇應一千

春冬綃各五匹綿各十五兩

內侍省內常侍供奉官十千

春冬綃各五匹內常

侍春加羅一匹冬綿十五兩供奉官冬止加綿二十兩

殿頭五千高品高班三千

春冬綃各四匹冬綿各二十兩

黃門二千

春冬綃各四匹冬綿十五兩 殿頭內侍入

內高品二千

春冬綃各三匹錢二千

高班內品一千五百

衣糧帶舊 黃

門內品在京人事一千

春冬各碧羅碧綾半匹黃綃生白綃各一匹綿八兩

寄班

小底二千

春冬綃各十匹

入內小黃門前殿祇候內品北班內

品外處揀來并城北班後苑把門內品掃洒院子及西

京內品依北班內品依舊在西京收管七百西京內品

五百

春冬綃各五匹綿各十五兩惟入內小黃門前殿祇候內品春冬綃各四匹

郢唐復州

內品三百

春冬綃各二匹布半匹錢一千舊志載內官不詳奉料皆減少

樞密都承旨

四十千副都承旨副承旨樞密院諸房副承旨逐房副

承旨

已上如帶南班官同

中書堂後官提點五房公事三十千

都承

旨以下春冬綃各十五匹春羅一匹逐房副承旨綃各十三匹都承旨承旨春加綾三匹冬五匹綿五十兩副

都承旨以下  
綿各三十兩

中書堂後官二十千特支五千

已上如帶京朝官同

中書樞密主事二十千錄事令史十千

春冬綃各十匹春羅一匹主事

已上冬綿五十兩錄事令史三十兩

主書七千守當官書令史五千

春冬綃各

二匹主書書令史春錢三千冬綿十二兩錢一千守當官春錢一千

自中書樞密并曾任

兩府雖不帶職

曾任兩府而致仕同

宣徽三司觀文資政翰林端

明翰林侍讀侍講龍圖天章學士樞密龍圖天章直學

士知制誥中書舍人待御史臺開封府節度使至刺

史三館祕閣審刑院刑部大理寺諸王府記室翊善以

下至諸王宮教授知審官院勾當三班院糾察刑獄判  
吏部銓南曹登聞檢院鼓院司農寺及國子監直講丞  
簿河北河東陝西轉運使皇子親王諸衛大將軍至率  
府副率兩省都知押班不帶遙郡諸司使副兩府供奉

官以下至內品

惟內品特給一分見錢

及樞密都承旨以下並給

見錢餘官并防禦使以下諸衛將軍橫行諸司使遙領

者悉一分見錢二分他物

其兩省都知副都知遙領刺史以上者即給一半見錢

三司檢法官十千

春冬絹各五匹冬綿十五兩願請前任請受者聽若轉京朝官隨本官料

錢衣

權知開封府并判官推官

料錢衣賜並隨本官舊志云判官三十千推官

二十千並給見錢

司錄二十千

如差負外郎已上充隨本官料錢衣賜

功曹法曹

十二千倉戶士兵四曹十千

差京朝官充隨本官料錢衣賜

刑部檢法

官法直官大理寺法直官副法直官十千

春冬綃各五匹冬綿十五

兩如轉京朝官隨本官料錢衣賜

西京軍巡判官十五千

內開封府轉至京官支本

官衣奉

西京南京北京留守判官河南應天大名府判官

三十千

春冬綃各十二匹冬綿二十兩

節度觀察判官二十五千

春冬綃各

六匹冬綿十二兩半

節度副使三十千行軍司馬二十五千

如簽書本

州公事衣奉依節察判官若監當  
即給一半折支衣賜厨料不給

節度掌書記觀察支

使二十千

綿絹如推官

留守推官府推官節度觀察推官十

五千

春冬絹各五匹冬綿十兩

防禦團練副使二十千

如監當即給一半折支

防禦團練判官十五千

兩朝志云奉依本州錄事參軍如無依倚郭縣令

防禦

團練軍事推官軍監判官七千軍事判官如本州錄事

參軍之數京府司錄參軍二十千諸曹參軍十千

以京官知

者奉從多給景德三年詔司錄六曹悉給春冬衣

五萬戶已上州

三京同

錄事參

軍二十千司理司法十二千司戶十千三萬戶已上州

錄事十八千司理司法十二千司戶九千一萬戶已上  
州錄事十五千司理司法十千司戶八千五千戶已上  
州錄事十二千司理司法十千司戶七千不滿五千戶

州錄事司理司法十千司戶七千別駕掌史司馬司士

參軍

如授士曹  
依司士

文學參軍七千東京畿縣七千戶已上

知縣朝官二十二千京官二十千五千戶已上知縣朝  
官二十千京官十八千三千戶已上知縣朝官十八千

京官十五千三千戶已下知縣止命京官十二千

已上  
衣賜

並隨本官

主簿尉十二千至七千戶四等

並給見錢

河南府河南

洛陽縣令三十千諸路州軍萬戶已上縣令二十千簿

尉十二千七千戶已上令十八千簿尉十千五千戶已

上令十五千簿尉八千三千戶已上令十二千簿尉七

千不滿三千戶令十千簿尉六千京朝官及三班知縣

者亦許給縣令奉本官奉多者以從多給

兼監兵者止請本奉添給

獄瀆廟令十千丞主簿七千

全折

幕職州縣料錢諸路支

一半見錢一半折支

縣尉全給見錢

廣東川陝並給見錢

元豐制行宰相三百千

衣賜綾綃綿皆如舊制然以左右僕射為宰相政和中以三公

為真相靖康依舊制樞密使帶使相侍中樞密使節度使同中書門下平章事以上及帶宣徽使并前兩府除節度使移鎮樞密使副知院帶節度使四百千自治平末至元豐四年如文彥博呂公弼馮京吳充先後為使副是年十一月始詔樞密院置知院同知院餘並罷至是既罷使副只置知院同知院直至靖康不改知

樞密院門下中書侍郎尚書左右丞同知樞密院事二

百千

衣賜如舊元祐中復置簽書樞密院事紹興中罷

太師太傅太保少師少

傅少保四百千

春服羅三匹小綾二十匹綃四十匹冬服小綾三十匹綃四十匹綿二百兩舊

制奉錢百二十千春服小綾十匹綃三十匹綿五十兩大觀間增改開

欽定四庫全書

宋史

十

府儀同三司百二十千

春冬各小綾十匹絹三十匹春羅一匹冬綿五十兩大觀二年

以無特任者遂刪去特進九十千

春冬各小綾十匹絹二十五匹春羅一匹冬綿五十兩

金

紫光祿大夫銀青光祿大夫光祿大夫六十千

春冬各小綾七

一匹絹二十匹春羅一匹綿五十兩

宣奉正奉正議通奉大夫五十五千

春冬各小綾五匹絹十七匹春羅一匹冬綿五十兩通議太中大夫五十千

元豐令太

中大夫以上下憂解官給舊官料錢

中大夫中奉中散大夫四十五千

春冬

各小綾三匹絹十五匹春羅一匹冬綿五十兩

朝議奉直朝請朝散朝奉大夫

三十五千

春冬各十三匹春羅一匹冬綿三十兩

朝請朝散朝奉郎三十

千

春冬服同正郎

承議奉議通直郎二十千

承議春冬絹各十匹春羅一匹冬綿

三十兩奉議通直

宣教郎十七千

春冬絹各六匹春羅一匹冬綿二十兩元

豐格有出身十七千無出身十四千六年

敕不以資考有無出身並十五千衣無羅宣義郎十二

千 春冬各絹五匹

承事郎十千

春冬絹各三匹

承奉郎

八千承務郎七千

元豐以來釐務止支

承直郎二十五

千 春冬絹各六匹

春冬絹各十二兩半元豐留守判官府判官

判官奉錢二十五千

春冬絹各六匹儒林郎二十千

十二兩半凡二等崇寧二年改從一等

春冬絹各五匹

綿十兩元豐節度掌書記觀察支使奉

錢衣賜如上防練軍事判官考任合八令錄者奉錢十

五千凡二等崇寧改從一等

文林郎十五千

同儒林

從事從政脩職

郎十五千

從事郎元豐舊制考第合入令錄者視令錄支未合入令錄者視判司簿尉支從政郎元

豐三京州府軍監司錄錄事參軍五萬戶以上二十千  
三萬戶以上十八千一萬戶以上十五千五千戶以上  
十二千不滿五千戶十千縣令一萬戶以上二千七百  
千戶以上十八千五千戶以上十五千三千戶以上十  
二千不滿二千戶十千  
凡二等崇寧改從一等迪功郎十二千  
元豐四京軍巡  
京州府軍監司法參軍五萬三萬戶以上十二千二萬  
戶及不滿五千戶七千三京州府軍監司戶參軍及五  
萬戶以上十千三萬戶以上九千一萬戶以上八千不  
滿五千戶七千凡三等崇寧改初熙寧四年中書門下  
言天下選人奉薄而多少不均不足以勸廉吏今欲月  
增料錢縣令錄事參軍三百六十七員舊請十千十二

千者增至十五千司理司法司戶參軍主簿縣尉二千一百五十三員舊請七千八百十千者增至十二千防團軍事推官軍監判官一百七十二員舊請七千者增至十二千月通增奉錢一萬二千餘貫米麥亦有增數從

太尉一百千

春冬各小綾十匹春羅一匹絹十匹冬絢二十匹綿五十兩帶節度使依本

節度使四百千

曾任執政以上除及移鎮初除及管軍並同舊制

承宣使三百

千

即節度觀察留後

觀察使防禦使二百千團練使百五十千

刺史一百千

自節度使以下至諸衛中郎將並如舊制

通侍大夫三十七千

正侍宣正協忠中侍中亮中衛翊衛親衛拱衛左武右

武大夫二十七千武功武德武顯武節武略武經武義

武翼大夫二十五千

春冬綰各十匹綿二十兩惟通侍大夫十二匹

正侍宣正

履正協忠中侍中亮中衛翊衛親衛拱衛左武右武武

功武德武顯武節武略武經武義武翼郎二十千敦武

郎十七千脩武郎十四千

春綰五匹冬七匹綿二十兩帶閣門祇候並同

從義

秉義郎十千

帶閣門祇候十二千

成忠保義郎五千

帶閣門祇候者九千並春

冬綰各四匹冬綿十五兩

承節承信郎四千

春冬綰各三匹錢二千

進武校尉

三千進義校尉二千

春冬綰各三匹

進武副尉三千守關進武

副尉守關進義副尉一千凡文武官料錢並支一分見

錢二分析支

曾任兩府雖不帶職料錢亦支見錢

職錢

御史大夫六曹尚書行六十千

守五十五千試五十千

翰林學士

承旨翰林學士五十千

衣賜本官例官小春冬服小綾各三匹絹各十五匹綿五十兩

左右散騎常侍御史中丞開封尹行一百千

守九十千試八十千

崇寧四年重定六曹侍郎

元祐中置權六曹尚書奉給依守侍郎紹聖中罷

行五十五

千

守五十千試四十五千太子賓客詹事行五十千

守四十七千試四十五千

給事中中書舍人行五十千

守四十五千試四十千

左右諫議大

夫

元祐中置權六曹侍郎奉給依諫議大夫紹聖中罷

行四十五千

守四十千試三十七千

太常宗正卿行三十八千

守三十五千試三十二千

祕書監行四十

二千

守三十八千試三十五千

七寺卿國子祭酒太常宗正少卿祕

書少監行三十五千

守三十二千試三十千

太子左右庶子行四

十千

守三十七千試三十五千

七寺少卿行三十二千

守三十千試二十八千

中書門下省檢正諸房公事尚書左右司郎中行四十

千

守三十七千試三十四千

國子司業少府將作軍器監行三十二

千

守三十千試二十八千

太子少詹事行三十五千

守三十二千試三十千

太子左右諭德行三十二千

守三十千試二十九千

起居郎起居

舍人侍御史左右司員外郎樞密院檢詳諸房文字尚

書六曹郎中行三十七千

守三十五千試三十二千

殿中侍御史左

右司諫行三十五千

守三十二千試三十千

左右正言行三十二

千

守三十千試二十七千

諸司員外郎行三十五千

守三十二千試三十千

少府將作軍器少監行三十千

守二十八千試二十五千

太子侍讀

侍講行二十五千

守二十二千試二十千

監察御史行三十二千

守三十千試二十七千

太子中舍太子舍人行二十二千

守二十千試十

太子宗正知大宗正祕書丞大理正著作郎太醫令

行二十五千

守二十二千  
試二十千

七寺丞行二十二千

守二十  
試十

祕書郎行二十二千

守二十千  
試十八千

太常博士著作佐郎

行守二十千

試十  
八千

國子監丞行二十二千

守二  
十千

大理司

直評事行二十二千

守二十千  
試十八千

少府將作軍器都水監

丞行二十千

守十  
八千

祕書省校書郎行十八千

守十六千  
試十四千

祕書省正字行十六千

守十五千  
試十四千

御史檢法官主簿行

二十千

守十  
八千

宗學太學武學博士行二十千

守十八千  
試十六千

律學博士行十八千

守十七千  
試十六千

太常寺奉禮郎行十六

千太常寺太祝郊社令行十八千

守十六千

太學正錄武學

諭行十八千

守十七千  
試十六千

律學正行十六千

守十五千  
試十四千凡

職事官職錢不言行守試者準行給衣隨寄祿官例支

及無立定例者並隨寄祿官給料錢米麥計實數給應

兩給者

謂職錢  
米麥

從多給承直郎以下充職事官

謂大理  
司直評

事祕書省正字太學博士正  
錄武學博士諭律學博士正

聽支階官請給

衣及厨料  
米麥不支

唐貞元四年定百官月俸僖昭亂離國用窘闕至天祐

中止給其半梁開平三年始令全給後唐同光初租庸使以軍儲不充百官奉錢雖多而折支非實請減半數而支實錢是後所支半奉復從虛折周顯德三年復給實錢宋初之制大凡約後唐所定之數乾德四年七月詔曰州縣官奉皆給他物頗間貨鬻不充其直責以廉隅斯亦難矣至有賦於塵肆重增煩擾且復抵冒公憲自罹刑辟甚無謂也漢乾祐中置州縣官奉戶除二稅外蠲其他後周顯德始革其制自今宜逐處置回易料

錢戶每本官所受物凡一千分納兩戶恣其貿易戶輸錢五百蠲役之令悉如漢詔所賦官物令諸州計度充一歲所給之數與蠶鹽同時並給之其萬戶縣令五萬戶州錄事兩京司錄舊月奉錢二萬者給四十戶率是為差簿尉及戶法掾舊月奉六千者增一千如其所增之數給與奉戶是歲令西川官全給實錢開寶三年令西川州縣官常奉外別給鐵錢五千四年十二月詔節察防團副使權知州事節度掌書記自朝廷除授及判

別廳公事者亦給之副使非知州掌書記奏授而不釐  
務者悉如故給以折色太平興國元年詔曰耕織之家  
農桑為本奉戶月輸絹錢蠹茲細民不易營置罷天下  
奉戶其本官奉錢並給以官物令貸鬻及七分仍依顯  
德五年十二月詔增給米麥二年二月詔諸道所給幕  
職州縣官奉頗聞官估價高不能充七分之數宜令三  
分給一分見錢二分解色令通判面估定官物不得虧  
損其價四月令西川諸州幕職官奉外更增給錢五千

雍熙三年文武官折支奉錢舊以二分者自今並給以實價端拱元年六月詔曰州郡從事之職皆參贊郡畫助宣條教而州縣之任並飭躬蒞政以綏吾民廩祿之制宜從優異庶幾豐泰責之廉隅除川陝嶺南已給見錢外其諸州府幕職州縣官料錢舊三分之二給以他物自今半給緡錢半給他物淳化元年五月詔致仕官有曾歷外職任者給半奉以他物充三年十一月令京東西河北河東陝西幕職州縣官料錢當給以他物者

每千給錢七百

初川陝廣南福建幕職州縣並許預借奉錢大中祥符間又詔江浙荆湖遠地

麟府等州河北河東緣邊州軍自今許預借兩月近地一月奉錢

至道二年詔先是京

官滿三十月罷給自今續給之真宗即位以三司估百

官奉給折支直率增數倍詔有司重定率優其數咸平

元年六月詔文武羣臣有分奉他所而身沒未聞計已

給者例追索可憫自今川陝廣南福建一季餘處兩月

悉蠲之

大中祥符七年詔三班使臣自今父母亡勿住奉

三年九月詔羣臣月

奉折支物無收其算五年七月增川陝路朝官使臣等

月給添支景德四年九月上以承平既久賦斂至薄軍國用度之外未嘗廣費自奉且以庶官食貧勸事遂詔自今掌事文武官月奉給折支京師每一千給實錢六百在外四百願給他物者聽大中祥符五年詔文武官

並增奉

三師三公東官三師僕射各增二十千三司御史大夫六尚書中丞郎兩省侍郎太常宗正卿

內客省使上將軍各增十千橫班諸司各增五千朝官五品正中郎將已上諸司使副各增三千京官內殿承制崇班閤門祗候各增二千供奉官各增一千五百奉職借職增一千餘如舊自乾興以後更

革為多至嘉祐始著祿令元豐一新官制職事官職錢

以寄祿官高下分行守試三等大率官以祿令為準而  
在京官司供給之數皆併為職錢如大夫為郎官既請  
大夫奉又給郎官職錢視嘉祐為優矣至崇寧間蔡京  
秉政吳居厚張康國輩於奉錢職錢外復增供給食料  
等錢如京僕射奉外又請司空奉其餘僉從錢米並支  
本色餘執政皆然視元豐制祿復倍增矣

武臣奉給

殿前司自宣武都指揮使三十千差降至歸明神武開

封府馬步軍都指揮使十五千凡二等殿前左右班虞候三十千至天武剡負都虞候十九千凡四等殿前班指揮使二十千至棟中剡負僚直廣德指揮使十千凡三等殿前班都知十三千至招箭班都知四千凡七等殿前班副都知十千至招箭班副都知三千凡五等殿前押班七千至招箭押班二千凡五等散指揮都頭復有押班之名者如押班給馬兵士內負僚直復有副指揮使行首副行首招箭班亦有行七千至三千凡三等

御龍直副指揮使都頭副都頭十將虞候十千至三千  
凡五等殿前指揮使五千至殿侍一千凡五等捧日天  
武指揮使十千至揀中廣德指揮使四千凡四等捧日  
天武副指揮使七千至擒戎副指揮使三千凡五等捧  
日軍使天武都頭五千至擒戎軍使千五百凡五等捧  
日副兵馬使三千至擒戎副兵馬使一千凡四等天武  
副都頭二千至廣德副都頭千五百凡二等捧日軍將  
二千至龍猛驍騎帶甲剝負軍頭十將三百凡八等天

武將虞候而下五百至飛猛驍雄將虞候已下三百凡六等此奉錢之差也其外月給粟自殿前班都頭虞候十五石至廣健副都頭吐渾十將二石五斗凡六等殿前指揮使五石鞭箭清朔二石凡五等殿前班都虞候已下至軍士歲給春冬服三十匹至油絹六匹而加綿布錢有差復月給僦糧自十人以至一人諸班諸直至捧日天武拱聖龍猛驍騎吐渾歸明渤海契丹歸明神武契丹直寧朔飛猛宣武虎翼神騎驍雄威虎衛聖清

朔擒戎軍士皆給僦一人以至半分餘軍不給焉侍衛  
馬軍步軍司自負條直龍神衛都虞候月給二十千至  
有馬勁勇貧七千凡五等指揮使自負條直龍神衛十  
千至順化三千凡五等副指揮使自負條直龍神衛七  
千至順化二千凡七等軍使都頭自龍神衛五千至看  
船神衛一千凡七等副兵馬使副都頭自龍神衛三千  
至順化一千凡五等軍頭十將自龍神衛千三百至順  
化三百凡五等此外負條直有行首副行首押番軍頭

都知副都知之名自行首五千至副都知一千凡六等而高陽關有驍捷左右廂都指揮使月給三十千開封府有馬步軍都虞候月給二十千六軍復有都虞候月給五千自貲僚直龍神衛而下皆月給粟自都虞候五石至順化忠勇軍士二石凡五等自都虞候以下至軍士皆歲給春冬服自絹三十匹至油絹五匹又加綿布錢有差復有給餼糧自十人至一人其貲僚直龍神衛雲騎驍捷橫塞及神衛上將虎翼清衛振武忠猛軍士

皆給僦一人至半分他軍不給馬

宣徽院軍頭司自負條至軍士咸月給錢

粟及春冬服有差

諸道州府廂軍自馬步軍都指揮使至牢城

副都頭凡五等月給奉錢凡五千至五百凡十有二等自河南府等五十州府鄧州等三十四州萊州等一百四十四州軍廣濟軍等三十九軍監所給之數差而減焉或著有司之籍外有給司馬芻秣歲給春冬服加紬綿錢布亦各有差

祿粟

自宰相至入內高品十八等

宰相參知政事樞密使同中書門下平章事樞密使副  
使知院事同知院事及宣徽使簽書樞密院事節度觀  
察留後知樞密院事及充樞密副使同知樞密院事并  
帶宣徽使簽書檢校太保簽書及三司使中書門下侍  
郎尚書左右丞太尉月各一百石樞密使帶使相節度  
使同中書門下平章事已上及帶宣徽使并前兩府除  
節度使樞密使副知院事帶節度使月各給二百石三  
公三少一百五十石權三司使公事七十石權發遣使

三十五石內客省使二十五石節度使一百五十石

管軍

同如皇族節度使同中書門下平章事已上并散節度使及帶王爵者並一百石

留後後改承

宣使觀察防禦使一百石

管軍并兩省都知押班諸衛大將軍橫行遙領者同惟皇

族遙領防禦使七十石

團練使七十石

管軍并皇族及軍班除充者同其餘正任並五十石

若皇族并兩省都知押班諸衛大將軍將軍橫行遙領者同

刺史五十石

皇族並軍班除充者

同其餘正任并管軍三十石兩省都知押班通侍大夫遙領者二十五石諸衛大將軍將軍遙領者十石橫行

遙領者全分二十五石減定十石捧日天武左右廂都指揮使龍衛神衛右廂都指揮使帶遙郡團練使五十

石殿前諸班直都虞候龍衛神衛及諸軍都指揮使帶遙郡刺史二十五石

凡一石給六斗

米麥各半

管軍支六分  
米四分麥

赤令七石丞四石京府司錄五

石諸曹參軍四石至三石有二等畿縣知縣六石至三

石有四等主簿尉米麥三石至二石有二等諸州錄事

五石至三石有三等司理司法四石至三石有二等司

戶三石二石有二等諸縣令五石至三石有三等

惟河  
南洛

縣令隨  
戶口支

簿尉三石二石有二等四京軍巡判官四石軍

監判官防團推官二石司天監丞四石主簿靈臺郎保

章正二石

已上並  
給米麥

入內侍省供奉官四石殿前高品

三石高班黃門入內內品管勾奉輦祇應入輦祇應二

石打牧祇應一石五斗

已上並給粳米

祇候殿頭祇候高品祇

候高班內品祇候內品祇候小內品貼祇候內品入內

內品後苑內品後苑散內品三石雲韶部內品一石

已上

並給月糧惟雲韶內品給細色

內侍省供奉官三石殿頭高品高班二

石黃門一石五斗

已上並給粳米

黃門內品在京人事二石五

斗北班內品前殿祇候內品外處揀來并城北班後苑

把門內品掃洒院子及西京內品與北班內品依舊在

西京收管西京內品郢唐復州內品二石入內小黃門

一石寄班小底四石

已上並給月糧惟入內小黃門給細色

殿頭內侍入

內高班一石

米麥各半

熙寧二年中書門下言天下選人奉

簿多少不一不足以勸廉吏欲月增米麥料錢縣令錄

事叅軍三百七十六負舊請米麥三石者並增至四石

司理司法司戶主簿縣尉二千五百一十三負舊請米

麥兩石者並增至三石防團軍事推官軍監判官一百

七十二負舊請米麥二石者並增至三石每月通增米

麥三千七十餘石從之

僦人衣糧

任宰相執政者有隨身任使相至正任刺史以上者有隨身餘止僦人

宰相并文臣充樞密使司中書門下平章事及樞密使

七十人

宰相舊五十人衣糧二十人日食後加

樞密使帶使相待中樞密

使節度使同中書門下平章事已上及帶宣徽使并前

兩府除節度使及節度使移鎮樞密使副知院事帶節

度使一百人叅知政事文臣充樞密副使知院事同知

院事及宣徽使不帶節度使簽書樞密院事節度觀察

留後知樞密院事并充樞密副使同知樞密院事并帶

宣徽使簽書樞密院事三司使門下侍郎中書侍郎尚

書左右丞五十人檢校太保簽書樞密院事三十五人

權三司使三十人權發遣公事十五人副使判官判子

司五人

副使判官權并權發遣同

觀文殿大學士二十人觀文殿學

士資政殿大學士十人資政端明翰林侍讀侍講龍圖

天章學士樞密直學士保和宣和延康殿學士寶文顯

謨徽猷閣學士七人

舊止給日食政和月糧二石

玉清昭應宮景靈

宮會靈觀三副使十人判官五人節度使留後改承宣

使觀察使五十人

管軍同如皇族節度使同中書門下平章事已上并散節度使帶王爵及

節度觀察留後帶郡王並五十人觀察使二十人兩省都知押班帶諸司使領節度觀察留後五十人兩省都

知押班并橫行領觀察使十五人

防禦使三十人

管軍同皇族并遙領並二十人兩省都知

押班帶諸司使并諸衛大將軍及橫行遙領並十五人

團練使三十人

管軍及軍班除充者

同其餘除授者二十人皇族充及帶領十五人兩省都知押班帶諸司使并橫行遙領者十人刺史二

十人

軍班除充者同其餘除授并管軍十人皇族充十人兩省都知押班帶諸司使五人橫行遙領全

分者五人減定者不給

內容省使

舊有景福殿使

二十人樞密都承旨十

人副都承旨副承旨諸房副承旨中書堂後官提點五  
房公事七人逐房副承旨五人中書堂後官至樞密院  
主事已上各二人錄事令史寄班小底一人

儻人餐錢

中書樞密宣徽三司及正刺史已上皆有衣糧餘止給餐錢

自判三館祕書監兩制兩省帶脩撰五千

郎中以下帶脩撰者三千

直館閣校理史館檢討校勘各三千直龍圖閣審刑院

詳議官國子監書庫官五千

自脩撰已上又有職錢五千校勘已上三千

京

畿諸司庫務倉場監官朝官自二十千至五千凡七等

京官自十五千至三千凡八等諸司使副閤門通事舍人承制崇班二十千至五千凡九等閤門祗候及三班十五千至三千凡十等內侍十七千至三千凡九等寄班八千至五千凡三等

舊志訛外今並從兩朝志

茶酒厨料之給

學士權三司使以上兼祕書監日給酒自五升至一升有四等法糯酒自一升至二升有二等又官觀副使端明殿學士

即觀文

資政殿大學士龍圖樞密直學士並有

給茶節度使副以下各給厨料六斗麪一石二斗

薪蒿炭鹽諸物之給

宰相舊無後加

宰相樞密使月給薪千二百束叅知政事樞密副使宣  
徽使簽書樞密院事三司使三部使權三司使四百束  
三部副使樞密都承旨一百五十匹樞密副都承旨中  
書提點五房一百束開封判官節度判官薪二十束蒿  
四十束開封推官掌書記文使留守節度推官防團軍  
事判官薪十五束蒿三十束留守判官薪二十束蒿三

十束防團軍事推官薪十束蒿二十束

宰相樞密使歲給炭自十月至正月二百秤餘月一百  
秤叅知政事樞密副使宣徽使簽書樞密院事三司使  
三部使三十秤文明殿學士資政殿大學士龍圖閣學  
士十五秤都承旨二十秤

給鹽宰相樞密使七石叅知政事樞密副使簽書院事  
宣徽使三司使三部使權三司使二石節度使七石掌  
兵遙領五石留後觀察防禦團練刺史五石

掌兵遙領  
皆不給

給馬芻粟者自二十匹至一匹凡七等

其軍職內侍三班伎術中書樞

密宣徽院侍衛殿前司皇城司內侍省入內內侍省吏屬借官馬者其本廐馬芻粟隨馬給

給紙者中書樞密宣徽三司官觀副使判官諫官皆月

給馬

自給茶酒而下兩朝志無三朝志雖不詳備亦足以見一代之制云

宋史卷一百七十一

宋史卷一百七十一考證

職官志十一皇親任諸衛大將軍領刺史八千○

臣開

鼎

按下文將軍刺史六十千將軍三十千率府率二十千副率十五千則本文職官較大未有八千之理疑有脫字

宋史卷一百七十一考證

欽定四庫全書

宋史卷一百七十二

元中書右丞相總裁托克托等修

職官志第一百二十五

職官十二 奉祿制下

增給 公用錢  
給券 職田

權三司使知開封府百千權發遣三司使五十千玉清  
昭應宮景靈宮會靈觀三副使觀文殿大學士三十千

觀文殿學士資政殿大學士

元豐添保和殿大學士

宮觀三司判

官判子司

權及權發遣同

開封府判官提舉諸司庫務管轄三

司軍大將提點內弓箭庫二十千宮觀都監勾當官十

七千

任都知押班者二十千

資政端明翰林侍讀

元祐復置翰林侍讀侍講學士

紹聖中罷

龍圖天章學士

元豐添保和延康寶文顯謨徽猷學士

樞密直

後改述古

殿龍圖天章直學士

元豐添寶文顯謨徽猷直學士保和龍圖天章寶文顯謨徽猷侍制

十五千

春冬綾各五匹絹十七匹羅一匹綿五十兩已上大學士至待制奉隨本官衣賜如本官例大

即依本官例小即依逐等大觀二年戶部尚書左詹言見編修祿格學士添支比正任料錢相去遠邈如觀文

殿大學士節度使從二品大學士添支三十千而已節  
度使料錢乃四百千僦從粟帛等稱是或謂大學士有  
寄祿官料錢故添支數少今以銀青光祿大夫任觀文  
殿大學士較之則通料錢不及節度使之半其厚薄不  
均明矣自餘學士視諸正任率皆不等欲將職錢改作  
貼職錢以別之正任料錢公使為率參酌立定自學士  
至直閣以上貼職錢不以內外並給觀文殿大學士百  
千觀文學士資政大學士八十千瑞明後改延康殿學  
士五十千前執政加二十千龍圖天章寶文顯謨徽猷  
學士樞密直改述古學士四十千龍圖天章寶文顯謨  
徽猷直學士三十千待制二十千集賢改集英殿脩撰  
十五千直龍圖閣至直祕閣十千詔從之宣和三年戶  
部尚書沈積中侍郎王蕃言元豐法帶職人依嘉祐祿  
令該載觀文殿大學士以下至直學士添支錢三等自  
三十千至十五千大觀中因敕令所啓請改作貼職錢  
觀文大學士至直祕閣自百千至十千凡九等兼增添

在京供職米麥觀文殿大學士至待制自五十石至二十五石四等比舊法增多數倍又奏學士提舉在京官除本身請給外更請貼職并差遣添支比六曹尚書翰林學士承旨幾及一倍以上非稱事制祿之意詔並依元豐法御史中丞二十千察案御史十千籍田令七千並依元豐三年詔司農寺丞十五千主簿京朝官十二千選人十千熙寧三年詔廣親睦親宅記室講書十五千教授十二千軍巡使十七千權使及判官七千已上並元豐制已下羣牧使副使開封推官三司河渠勾當惟增散官而已

公事同管勾河渠案公事十五千羣牧都監十三千銀臺司審官院三班院吏部銓登聞檢院鼓院太常禮院主判官糾察在京刑獄羣牧判官監察使十千判司農

寺七千其知判諸路州軍府有六十千至七千凡八等

有以官者三師三公六十千僕射東宮三師并曾任中

書樞密特進五十千尚書并左右丞東宮三少金紫光

祿大夫至光祿大夫學士給事中諫議舍人待制已上

并橫班使副三十千

橫班有二百千者待制已上充益梓利夔州路知州給鐵錢二百千

橫班副使知夔州一百五十千知諸州軍者八十千

大卿監諸司使副至供奉官

中大夫至中散大夫武功郎至秉義郎閣門祗候已上

十五千

十五千已上有從州府地望給者不係大卿充益梓利夔知州給鐵錢一百五十千諸司副使

至供奉官閤門祇候已上知四州同若朝官忠翊郎侍  
知諸州軍八十千惟諸司使一百千

禁閤門祇候十千

朝官權知軍州府者同若知四路諸  
州府給鐵錢八十千知軍六十千侍

禁閤門祇候保義郎殿直閤門祇候八千

若知四路諸  
州軍者給鐵

錢五十千京官十千至七千有二等

知四路州府給鐵錢  
六十千知軍五十千試

御及州縣官職官兼知春州七千有以州望者河南大

名荆南永興江寧杭揚潭并代州三十千應天真定鳳

翔陝府秦青洪州二十千河中鄆許襄孟滑鄭滄邢澶

貝相華晉潞廬壽宿泗楚蘇越潤常州十五千

廣州知  
州歲七

百千逐月均給舊月給百千大中祥符六年令歲取五百千餘充添給益州給鐵錢三百千梓州二百千夔州百五十千餘州約有都總管經略安撫等使者河北四銅錢數而給之

路真定瀛州定州大名陝西逐路

永興秦州渭州慶州延州

河東路太原前任兩

府並五十千諫議舍人待制太中大夫已上三十千

並特

添二十千知大名府帶河北路安撫使同知并州帶學士即五十千而無特給

三路管勾機宜

文宇朝官十千京官七千知貴州充廣南西路都鈐轄

經略安撫使自諫議舍人待制及大卿監大中大夫中

散大夫已上三十千

朝臣充廣西路兵馬都鈐轄兼本路安撫管勾經略司公事即二十

千河北沿邊安撫副使都監以橫行使充者三十千自橫

行副使并諸司使副至崇班武功大夫敦武郎以上充者二十千供事官秉義郎閤門祇候充都監十五千

同管勾河東緣邊安撫司公事以橫行副使至內殿崇

班敦武郎以上二十千通判大藩有二十千至十五千

者餘州軍朝官有十千至七千者京官七千朝官通判益州給鐵

錢八十千京官六十千朝官通判益梓利簽判朝官十夔路州軍府給鐵錢七十千京官五十千

千京官七千朝官簽判益梓州給鐵錢七十千京官五十千三路轉運使淮南

江浙荆湖制置茶鹽等稅都大發運使諫議待制大卿

監以下大中中散以上三十千朝官充發運使副二十

千

武功大夫至武翼郎諸司使副充發運使副都監同朝官充判官十千

三門白波發運

使朝官二十千朝官充判官十千京官七千諸路轉運

使副朝官宣德郎以下二十千

任四路者給錢一百五十千

判官十

千

任福建廣南東西路十五千任益梓利夔四路給鐵錢八十千

諸路提點刑獄勸農

使副開封府界提點諸縣鎮公事二十千

忠翊郎侍禁閣門祇候以

下任諸路提點刑獄勸農使副并府界同提點敦武郎內殿崇班以上者十五千朝官并秉義郎供奉官閣門祇候已上任四路提點刑獄給鐵錢一百五十千忠翊郎侍禁閣門祇候以下一百千諸路副都

總管權總管都鈐轄路分鈐轄州鈐轄路分都監有五

十千至八千凡六等

任四路給鐵錢有二百千至一百千凡三等

府界及諸

路州府軍監縣鎮都監巡檢砦主監押自諸司使以下

至三班借職武功大夫至承信郎已上十五千至五千

凡六等

任四路給鐵錢有一百千至五十千凡四等

陝西河東沿邊諸族蕃

官巡檢自十五千至四千凡六等諸路走馬承受公事

自從義郎至保義郎供奉官至殿直并兩省自供奉官

至黃門自十千至五千凡四等

任四路給鐵錢自六十千至四十千凡三等

府界並諸路州府軍監縣鎮監當朝官七千京官五千

至四千凡二等武功大夫以下至進義校尉諸司使以

下至三班使臣自十千至三千凡七等

朝官任川峽州府軍監給鐵錢

五十千京官三十千至二十五千凡二等三班使臣任四路者自六十千至二十五千凡五等

朝官充

陝西及江浙荆湖福建廣南提舉提點鑄錢等公事自

二十千至十五千凡二等朝官充都大提舉河渠司勾

當及提舉宮觀并催遣輦運催綱諸州監物務等自十

五千至七千凡三等

任四路給鐵錢七十千

京官充催促輦運催

裝斛斗綱船并諸州監物務等自七千至五千凡二等

任四路給鐵錢五十千

都大提舉脩護黃河堤埽岸諸處巡檢并

監北京大內軍器庫并蔡河撥發催綱等並以兩省供

奉官以下至內品充自十千至三千凡七等

舊志有諸路都部署

幹轄有五十千至十五千凡四等駐泊都監兵馬都監有二十千至十五千凡六等諸州監場務朝官供奉以

上七千京官殿直五千奉職內品三千內課額大者京朝官與京官同使臣與兵馬監押同

大中祥符二年詔外任官不得挈家屬赴任者許分添

給錢贍本家

添給羊凡外任給羊有二十口至二口凡六等

給米有二十石至二石凡七等

給麪有三十石至二石凡七等

僦從有二十人至二人凡七等

馬有十匹至一匹凡六等

舊志數不同  
今從四朝志

建炎南渡以後奉祿之制參用嘉祐元豐政和之舊少  
所增損惟兵興之始宰執請受權支三分之一或支三  
分之二或支賜一半隆興及開禧自陳損半支給皆權

宜也其後内外官有添支料錢職事官有職錢厨食錢  
職纂脩者有折食錢在京釐務官有添支錢添支米選  
人使臣職田不及者有茶湯錢其餘祿粟僉人悉還疇  
昔今合新舊制而參記之

元豐定制以官寄祿南渡重加脩定開府儀同三司料

錢一百貫特進九十貫

春冬衣絹各二十五匹小綾一  
十匹春羅一匹冬綿五十兩

金紫光祿大夫銀青光祿大夫

料錢各六十貫春冬絹  
各二十匹小綾七匹春

羅一匹冬  
綿五十兩

宣奉大夫正奉大夫正議大夫通奉大夫

料錢

各五十貫春冬絹各十七匹小通議大夫太中大夫中綾五匹春羅一匹冬綿五十兩

大夫中奉大夫中散大夫

料錢各四十五貫春冬絹各二十五匹小綾三匹春羅一

匹冬綿五十兩

朝議大夫奉直大夫朝請大夫朝散大夫朝奉

大夫

以上料錢各三十五貫春冬絹各一十五匹春羅一匹冬綿三十兩

朝請郎朝散郎

朝奉郎

以上料錢各三十貫春冬絹各一十三匹春羅一匹綿三十兩

承議郎

料錢二十貫春

冬絹各一十匹春羅一匹冬綿三十兩

奉議郎

料錢二十貫春冬絹各一十匹春羅一匹冬綿三十兩

通直郎

料錢十八貫春冬絹各七匹春羅一匹冬綿三十兩

宣教郎

料錢十五貫春冬絹五匹

冬綿十兩

宣議郎

料錢十二貫春冬絹各五匹冬綿十五兩

承事郎

料錢十貫春冬絹各

五匹冬綿

承奉郎

料錢八貫

承務郎

料錢七貫元豐以來釐務止支驛料大觀二年

定以上料錢一分見錢二分折支每貫折錢在京六百

丈在外四百丈到任添給驛料承直郎

料錢二十五貫茶湯錢一十貫

厨料米六斗麪一石五斗橐四十束柴二  
十束馬一匹春冬絹六匹綿一十二兩

儒林郎

料錢二十

貫茶湯錢一十貫厨料米六斗麪一石五斗橐  
三十束柴一十五束春冬絹各五匹冬綿十兩

文林郎

料錢一十五貫茶湯錢十貫厨料米六斗麪一石  
五斗橐三十束柴十五束春冬絹各五匹綿十兩

從事

郎從政郎脩職郎

已上料錢各一十五貫茶湯錢一十貫米麥各二石

迪功郎

料錢

一十二貫茶湯錢一十貫米麥各一石五斗

以上錢折支中給一半見錢一

半折支每貫折見錢七百文釐務日給滿替日住武臣

請奉太尉

料錢一百貫春服羅一匹小綾及絹各十匹冬服小綾十匹絹二十匹綿五十兩

正

任節度使

在光祿大夫之下初授及帶管軍同料錢四百貫祿粟一百五十石

承宣使

在通

議大夫之下料錢三百貫祿粟一百石

觀察使

在中大夫之下料錢各二百貫祿粟一百石米麥十

五防禦使

在中散大夫之下料錢二百貫祿粟一百石米麥各十二石五斗

團練使

在中

散大夫之下料錢一百五十貫祿粟七十石米麥各九石

諸州刺史

在中散大夫之下料錢一百貫

祿粟五十石米麥各七石五斗

自承宣使以下不帶階官者為正任帶

階官者為遙郡遙郡各在正任之下請奉與次任正任

一同靖康指揮遙郡以上奉錢衣賜僉人奉馬權支三  
分之二殿前三衙四廂捧日天武左右廂都指揮使遙

郡團練使

料錢一百貫文春冬服絹各十匹

殿前諸班直都虞候諸軍

都指揮使遙郡刺史

料錢五十貫衣同前

龍衛神衛右廂都指揮

使遙郡團練使

同捧日天武

龍神衛諸軍都指揮使遙郡刺

史

同殿前

左右金吾衛上將軍左右衛上將軍

在光祿大夫之下

諸衛上將軍

在通奉大夫之下以上料錢各六十貫春冬綾各五匹絹各一十匹春羅一匹冬綿

五十兩

左右金吾衛大將軍

在中散大夫之下料錢三十貫春冬綾三匹絹七匹春

羅一匹綿三十兩諸衛大將軍在中散大夫之下料錢二十五貫春冬綾三匹絹各七匹春羅

一匹冬綿二十兩諸衛將軍在朝奉郎之下料錢二十五貫春冬綾各二匹絹各七匹春羅一匹

冬綿十五兩率府率在奉議郎之下率府副率在通直郎之下料錢十三貫春冬絹各五

匹春羅一匹冬綿一十五兩通侍大夫在中散大夫之下料錢五十貫祿粟二十五石春絹七匹

冬絹十匹綿三十兩僚二十人馬三匹正侍大夫宣正大夫履正大夫協

忠大夫中侍大夫以上在中散大夫之下料錢各三十貫祿粟二十五石春絹七匹冬絹

十匹綿三十兩僚二十人馬三匹中亮大夫在中散大夫之下料錢三十貫祿粟二十五石春

絹七匹冬絹十匹綿三十兩僚三十人馬三匹中衛大夫翊衛大夫親衛大夫

在中散大夫之拱衛大夫左武大夫右武大夫並奉直大夫

下防禦使之上之下諸司正使之上以上料錢並二十七貫春絹七匹冬絹十匹綿三十兩武功大夫武德

大夫武顯大夫武節大夫武略大夫武經大夫武義大

夫武翼大夫並在朝奉大夫之下以上各料錢二十五貫厨料米一石麪二石春絹七匹冬絹十

匹綿三十兩正侍郎宣正郎履正郎協忠郎中侍郎中亮郎

中衛郎翊衛郎親衛郎拱衛郎左武郎右武郎以上並

郎之下錢各二十貫春絹五匹冬絹七匹綿三十兩武功郎武德郎武顯郎武節

郎武略郎武翼郎武義郎並在承議郎之下以上各料錢二十貫厨料米麪各一石

春絹五匹冬絹七匹綿二十兩訓武郎料錢一十七貫春絹三匹綿三十兩脩武郎

料錢一十七貫春絹五匹冬絹七匹綿二十兩從義郎秉義郎並料錢十貫帶職錢十二貫春

絹四匹冬絹五匹綿一十兩忠訓郎忠翊郎並料錢七貫帶職錢十貫春冬絹各四匹冬綿

一十兩成忠郎保義郎並料錢五貫帶職錢七貫春五兩承節

郎承信郎並料錢四貫春冬絹各三匹錢二貫文進武校尉料錢三貫春冬絹各三匹

進義校尉料錢二貫春冬絹各三匹下班祗應各隨差使理年不等自三年至十二月料

錢七百文糧二石五斗春冬絹各五匹進武副尉料錢三貫進義副尉料錢一貫守

進義副尉料錢二貫

料錢職錢紹興仍政和之舊宰相樞密使料錢月三百

貫

政和左輔右弼為宰相紹興左右僕射同中書門下平章事為宰相舊制春冬服小綾各二十匹絹各三

十匹春羅一匹冬綿一百兩初建炎元年指知樞密院

事參知政事樞密副使同知樞密院事簽書樞密院事

料錢二百貫春冬服小綾各十匹絹各二十匹春羅一匹冬綿五十兩

太師太傅太保少

師少傅少保

料錢三百貫春服羅三匹權支一匹小綾三十匹文二十匹絹四十匹支三十匹冬

服綾絹同綿二百兩支一百兩

以下職事官並支職錢開封牧錢一百

貫

春服羅一匹小綾絹各十匹冬服小綾十匹絹二十匹綿五十兩

太子太師太傅太

保職錢二百貫

春服羅一匹小綾十匹絹二十匹冬服綾絹同綿五十兩

少師少

傅少保百五十貫

春冬服小綾各七匹絹各二十匹春羅一匹冬綿五十兩

御史大

夫六部尚書

行六十貫守五十五貫試五十貫春服羅一匹小綾五匹絹十七匹冬服綾絹同綿

五十翰林學士承旨翰林學士五十貫

春服

左右散騎

常侍

行五十五貫守五十貫試四十五貫春服小綾三匹絹十五匹羅一匹冬綾絹同綿五十兩

權

六曹尚書御史中丞六曹侍郎並同常侍太子賓客

行五

十貫守四十七貫試四十五貫春服小綾七匹絹二十匹羅一匹冬綾絹同綿三十兩

太子詹事

錢衣同賓客小綾各上三匹給事中中書舍人

行五十貫守四十五貫試四十貫服同詹

事 左右諫議大夫

行四十五貫守四十貫  
試三十七貫餘同舍人

權六曹侍郎

職錢四十貫  
絹同上

大常宗正卿

行三十八貫守三十五貫  
試三十二貫春冬衣隨官序

祕

書監

行四十二貫守三十  
八貫試三十五貫

七寺卿國子祭酒

行三十五  
貫守三十

二貫試  
三十貫

太常宗正少卿祕書少監

行三十二貫守三十  
十貫試二十八貫

中

書門下省檢正諸房公事左右司郎中

行四十貫守三十  
七貫試二十

五貫國子司業少府將作軍器監

行三十二貫守三十  
十貫試二十八貫

太子

少詹事

行三十五貫守三十  
二貫試三十貫

太子左右諭德

行三十三貫  
守三十貫試

二十貫起居郎起居舍人侍御史

行三十七貫守三十  
五貫試三十二貫

左

右司員外郎六曹郎中

同上

殿中侍御史左右司諫

行三十五

貫守三十二  
貫試三十貫

左右正言

行三十二貫守三  
十貫試三十七貫

諸司員外郎

同司諫

少府將作軍器少監

行三十貫守二十  
八貫試二十五貫

太子侍讀

侍講

行二十五貫守二  
十二貫試二十貫

監察御史

同正言

太子中舍人太

子舍人

行二十貫守十  
九貫試十八貫

太常丞太醫令宗正丞知大宗

正丞祕書丞大理正著作

行二十五貫守二十  
二十貫紹興元年指揮宣教

郎任館職寺監丞簿評事臺法主簿寺簿正司  
直添給職錢十六貫指揮每月特支米三石

七寺丞

行二十二貫  
守二十貫

祕書郎

行二十二貫守二  
十貫試一十八貫

太常博士

同七寺丞

著作佐郎

同祕書郎

國子監丞

同七寺丞

大理司直評事

同著作郎

少

府將作都水監丞

行二十貫守十八貫

祕書省校書郎

行十八貫守十六貫

試十貫正字

行十六貫守十四貫

御史臺檢法主簿九寺簿

行二

十貫守十八貫

諸王宮大小學教授大學武學博士

行二十貫守十八貫

試十六貫今諸王府翊善贊讀直講記室料錢並支見錢

律學博士

行十八貫守十七貫試十六貫

太常寺奉禮郎

十六貫

太常寺太祝郊社令

行十八貫守十六貫

太

官令

十六貫

五監主簿

行十八貫守十六貫

太學正錄武學諭

行十八貫

守十七貫試十六貫

律學正

行十六貫守十五貫試十四貫

樞密院官屬都承旨承旨

料錢四十貫職錢三十貫承旨二十五貫春服羅一匹小

綾三匹絹十五匹冬服小綾五匹絹十五匹綿五十兩

副都承旨

料錢三十貫職錢二十貫副承

旨諸房副承旨十五貫若諸房副承旨同主管承旨司公事加五貫春衣羅一匹絹十五匹冬絹同綿三十兩

檢詳諸房文字

職錢三十五貫厨食錢每日五百

計議編脩官

添支錢十貫第

三等折食錢二十五貫厨食錢每日五百

凡諸職事官職錢不言行守試者

準行給職事官衣如寄祿官例及無立定則例者隨寄

祿官給職料錢米麥計實數給兩應給者從多給

謂職錢米

麥諸承直以下充職事官

謂大理司直評事祕書省正字太學博士正錄武學博士

諭律學博士正

聽支階官請受添給諸稱請受者謂衣糧料錢

餘並為添給舊制觀文殿大學士三十貫

米三石 麪五石觀文

殿學士資政保和殿大學士三十貫

米三石 麪五石資政保和

殿學士十五貫

米三石 麪五石 同上 春冬小綾各五匹 絹各十七匹 春羅一匹 冬綿十五兩

龍圖天章寶文顯謨徽猷敷文閣學士直學士十五貫

春冬小綾各三匹 絹十五匹 保和殿龍圖天章寶文顯謨 匹 春羅一匹 冬綿十五兩

徽猷敷文閣待制同先是大觀或言添支厚薄不均其

後自學士而下改名貼職錢觀文殿大學士

貼職錢一 百貫 文米

麥各二十五石添支米三石麪五石萬字茶二斤 觀文殿學士資政保和殿大

學士

貼職錢八十貫米麥同添支錢十貫添支米麪同

資政保和殿學士

貼職錢七

十貫米麥同添支米麪同萬字茶二斤春冬綾二匹絹一十七匹綿五十兩羅一匹端明殿學士

貼職錢五十貫米麥二十石添支米三石麪五石萬字茶二斤春冬綾五匹絹一十七匹羅一匹綿五十兩

龍圖天章寶文顯謨徽猷敷文閣學士樞密直學士 正三

品貼職錢四十貫米麥各一十石添支米二石麪五石萬字茶二斤春冬綾五匹絹一十七匹春羅一匹冬綿

五十 龍圖天章寶文徽猷敷文閣直學士保和殿待制

貼職錢三十貫米麥各一十七石五斗春冬綾各三匹絹一十五匹春羅一匹冬綿五十兩 龍圖天

章寶文顯謨徽猷敷文閣待制

貼職錢二十貫米麥各一十二石五斗春冬綾

各三匹絹一十五匹春羅一匹冬綿五十兩

集英殿脩撰右文殿脩撰祕閣

脩撰

以上貼職錢各一十五貫

直龍圖天章寶文閣直顯謨徽猷敷

文閣直祕閣

以上貼職錢各一十貫

宣和間罷支貼職錢仍舊制

添支紹興因之令諸觀文殿大學士至保和殿大學士

料錢春冬服隨本官資政殿學士至待制料錢隨本官

春冬服從一多給又諸學士添支錢曾任執政官以上

者在京外任並支其餘在京支外任不支米麪茶炭奉

馬廉人衣糧內外任並給酒添支馬草料外任勿給外

依祖例添支

如六部尚書而下職事官分等第支厨食錢自十五貫至九貫凡四等並依宣和指

揮修書官折食錢監脩國史四十千史館脩撰直史館本省長貳三十七貫五百檢討著作三十五貫並依自

來體

有特旨添支

如紹興元年指揮館職寺監丞簿評事臺法主簿寺正司直博士添職錢

一十貫六年指揮五寺三監秘書大宗正丞太常博士著作祕書校書郎著作佐郎正字大理寺正司直評事

臺簿刪定官檢鼓奏告院特支米三石計議編修官一石

祿粟及隨身廉人

宰相一百石

紹興三公侍中中書尚書令左

隨身七十

人知樞密院事參知政事樞密副使同知樞密院事一

百石隨身五十人太師太傅太保少師少傅少保一百

石

舊制百五十石

隨身一百人太尉一百石隨身五十人節度

使

祿粟已具奉祿類

元隨五十人承宣使元隨五十人觀察使

防禦使元隨三十人團練使

已上並具奉祿類

元隨三十人諸

州刺史

同上

元隨二十人通侍大夫正侍大夫宣正大夫

履正協忠中侍中亮大夫

祿粟僚人並具奉祿類

捧日天武左右

廂都指揮使遙郡團練使五十石儼十人

龍神衛右廂都指揮

使帶遥郡團練使同

殿前諸班直都虞候諸軍都指揮使遥郡刺

史二十五石僉五人

龍神衛諸軍都指揮使帶遥郡刺史同

諸學士添支

米已附于前今載觀文殿大學士僉二十人觀文殿學

士資政保和殿大學士僉十人資政保和殿學士龍圖

天章寶文顯謨徽猷敷文閣學士僉七人樞密都承旨

僉十人副都承旨諸房副承旨七人其餘京畿守令幕

職曹官自十石七石五石至于二石各有等中書堂後

官提點五房公事逐房副承旨自七人五人至于一人

各有數因仍前制舊史已書凡任宰相執政有隨身太尉至刺史有元隨餘止儼人

紹興折色凡祿粟每石細色六斗

米麥中支管軍給米六分麥四分

隨

身元隨儼人糧每斗折錢三十文衣紬絹每匹一貫布每匹三百五十文綿每兩四十文

公用錢

自節度使兼使相有給二萬貫者其次萬貫至七千貫凡四等節度使萬貫至三千貫凡四等節度觀察留後

五千貫至二千貫凡四等觀察使三千貫至二千五百貫凡二等防禦使三千貫至千五百貫凡四等團練使二千貫至千貫凡三等刺史千五百貫至五百貫凡三等亦有不給者

觀察使以下在禁軍校者皆不給

京守在邊要或加錢

給者如故皆隨月給受如祿奉焉

咸平五年令河北河東陝西諸州皆逐李

給

京師月給者玉清昭應宮使百千景靈宮使崇文院

七十千會靈觀使六十千祥源觀都大管勾五十千御史臺三百千大理寺二百五十三千刑部九十六千舍

人院二十千太常寺二十五千祕閣二十千宗正寺十  
五千太常禮院起居院十千門下省登聞檢院鼓院官  
誥院三班院各五十千歲給者尚書都省銀臺司審刑  
院提舉諸司庫務司每給三十千用盡續給不限年月  
餘文武常參官內職知州者歲給五千至百千凡十三  
等皆長吏與通判署籍連署以給用少卿監以上有增  
十千至百千者

淳化元年九月詔諸州軍監縣無公使  
處遇誕降節給茶宴錢節度州百千防

團刺史州五十千監三泉縣三十千嶺  
南州軍以幕府州縣官權知州十千

給券

文武羣臣奉使於外藩郡入朝皆往來備饗餼又有賓幕軍將隨身牙官馬驢索駝之差節察俱有賓幕以下

中書樞密三司使有隨身而無牙官軍將隨諸司使以

上有軍將索駝

餘皆有牙官馬驢  
惟節察有賓幕

諸州及四夷貢奉使

諸司職掌祇事者亦有給馬

四夷有譯語通事書狀換  
衣十券頭首領部署子弟

之名貢奉使有廳頭子將  
推船防授之名職掌有僊

京朝官三班外任無添給者

止續給之京府按事畿內幕職州縣出境比較錢穀覆

按刑獄並給券其赴任川陝者給驛券赴福建廣南者  
所過給倉券入本路給驛券皆至任則止車駕巡幸羣  
臣扈從者中書樞密三司使給館券餘官給倉券

職田

周自卿以下有圭田不稅晉有芻橐田後魏宰人之官  
有公田北齊一品以下公田有差唐制內外官各給職  
田五代以來遂廢咸平中令館閣檢校故事申定其制  
以官莊及遠年逃亡田充悉免租稅佃戶以浮客充所

得課租均分如鄉原例州縣長吏給十之五自餘差給其兩京大藩府四十項次藩鎮三十五項防禦團練州三十項中上刺史州三十項下州及軍監十五項邊遠小州上縣十項中縣八項下縣七項轉運使副十項兵馬都監押砦主釐務官錄事參軍判司等比通判幕職之數而均給之景德二年七月詔諸州職田如有災傷準例蠲課大中祥符九年殿中侍御史王奇上言請天下納職田以助振貸帝曰奇未曉給納之理然朕每覽

法寺奏款外官占田多踰往制不能自備牛種水旱之際又不蠲省致民無告遂罷竒奏因下詔戒飭之天聖中上患職田有無不均吏或多取以病民詔罷天下職田悉以歲入租課送官具數上二司計直而均給之朝廷方議措置未下仁宗閱具獄見吏以賄敗者多惻然傷之詔復給職田毋多占佃戶及無田而配出所租違者以枉法論又十餘年至慶歷中詔限職田有司始申定其數凡大藩長吏二十頃通判八頃判官五頃幕職

官四項凡節鎮長吏十五項通判七項判官四項幕職  
官三項五十畝凡防團以下州軍長吏十項通判六項  
判官三項五十畝幕職官三項其餘軍監長吏七項判  
官幕官並同防團以下州軍凡縣令萬戶以上六項五  
千戶以上五項不滿五千戶並四項凡簿尉萬戶以上  
三項五千戶以上二項五十畝不滿五千戶二項錄事  
參軍比本判官曹官比倚郭簿尉發運制置轉運使副  
武臣總管比節鎮長吏發運制置判官比大藩府通判

安撫都監路分都監比節鎮通判大藩府都監比本府  
判官黃汴河許汝石塘河都大催綱比節鎮判官節鎮  
以下至軍監諸路走馬承受并砦主都同巡檢提舉捉  
賊提點馬監都大巡河不得過節鎮判官在州監當及  
催綱撥發巡捉私茶鹽賊盜駐泊捉賊不得過簿尉自  
此人定制士有定限吏以職田抵罪者視昔為庶幾  
馬至熙寧間復詔詳定凡知大藩府

三京京兆成都太  
原荆南江寧府延

秦揚杭  
潭廣州

二十項節領十五項餘州及軍

淮陽無為臨江  
廣德興國南康

南安建昌  
邵武興化

並十項餘小軍監七項通判藩府八項節鎮

七項餘州六項留守節度觀察判官藩府五項節鎮四  
項掌書記以下幕職官三項五十畝防禦團練軍使推  
官軍監判官三項令丞簿尉萬戶以上縣令六項丞四  
項不滿萬戶令五項丞三項不滿五千戶令四項丞二  
項五十畝簿尉減令之半藩府節鎮錄參視本州判官  
餘視幕職官藩府節鎮曹官視萬戶縣簿尉餘視不滿  
萬戶者發運轉運使副視節鎮知州開封府界提點視

餘州發運轉運判官常平倉司提舉官視藩府通判同  
提舉視萬戶縣令發運司幹當公事視節鎮通判轉運  
司管幹文字提刑司檢法官提舉常平倉司幹當公事  
視不滿萬戶縣令蔡河許汝石塘河都大催綱管幹機  
宜文字府界提點司幹當公事視節鎮判官總管視節  
鎮知州路分鈐轄視餘州知州安撫路分都監州鈐轄  
視節鎮通判藩府都監視本州判官諸路正將視路分  
都監副將視藩府都監走馬承受諸州都監都同巡都

大巡河並視節鎮判官巡檢堡砦都監砦主在州監當  
及催綱撥發巡捉私茶鹽賊盜駐泊捉賊並視幕職官  
巡轄馬遞鋪監堰并縣鎮砦監當並視本縣簿尉諸路  
州學教授京朝視本州判官選人視本州曹官又詔成  
都府路提點刑獄司以本路職田令逐州軍歲以子利  
稻麥等拘收變錢從本司以一路所收錢數又紐而為  
斛斗價值然後等第均給自熙寧三年始知成都府一  
千石轉運使六百石鈐轄二員各五百石轉運判官視

鈐轄通判二員各四百五十石簽判節推察推知錄幹

當糧料院監軍資庫都監都巡檢巡檢以大使臣走馬

承受京朝官知縣各二百石

內職官係兩使支掌以上資序者同如係初等及權

入者各一百五十石

監商稅市賈院交子務

係京朝官或大使臣充者視職官

城外巡檢排岍十縣巡檢

係三班使臣者

各一百五十石司理

司戶司法府學教授

係敕劄正授者

監甲仗庫各一百石知眉

蜀鼓雅邛嘉簡陵州永嘉軍視成都通判其通判減三

之一知威黎茂州視眉蜀通判其都監監押駐泊都巡

檢

係大使臣者

簽判推判官

係兩使職官并支掌以上資序

知錄京朝官并

職官知縣監棚口鎮

係京朝官

視成都職官監押巡檢同巡

檢駐泊

係三班使臣

初等職官或權入職官錄事參軍縣令

試街知縣視成都城外巡檢司理司戶司法諸縣主簿

尉應監當場務選人監稅監鹽巡轄馬鋪

係三班使臣

視成

都曹官應諸縣令佐係職員權攝者不給歲有豐凶則

數有少剩皆隨時等級為之增減

初權御史中丞呂誨御史知雜劉述奉詔

同均定成都梓利夔四路職田誨等以成都路歲收子利稻麥桑絲麻竹等物逐處不同遂計實直紐作稻穀

一色每半中價百有二十自知成都府以官屬等第均  
定及再詔詳定而三路數少均分不足用定到成都路  
數目以聞中書再行詳定而有是詔元豐中詔熙河涇原蘭州路州軍官

屬職田每頃歲給錢鈔十千

以其原給田及新造之區募弓箭手及留其地以為

營元符三年朝散郎杜子民奏職田之法每患不均神  
宗首變兩川之法均給上下一路便之元祐中推廣此  
意以限月之法變而均給士大夫貪冒者或窮日之力  
以赴期會或交書請屬以倖權攝奔競之風長庶恥之  
節喪乞復元豐均給之法以養士庶節從之建中靖國

元年知延安府范純粹奏昨帥河東日聞晉州守臣所得職田因李君卿為州諭意屬邑增廣租入比舊數倍後襄陵縣令周汲力陳其弊郡守時彥歲減所入十七八佃戶始脫苛歛之苦而晉絳陝三州圭腴素號優厚多由違法所致或改易種色或遣子弟公阜監獲貪汚猥賤無所不有乞下河東陝西監司悉令改正從之大觀四年臣僚言圭田欲以養廉無法制以防之則貪者奮矣姦吏挾肥瘠之議以逞其私給田有限課入無算

祖宗深慮其弊以提點刑獄官察之而未嘗給以圭租  
庶不同其利而公其心也近歲提點刑獄所受圭租同  
於他司故積年利病壅於上聞元豐舊制檢法官其屬  
也當視其長自元祐初併提舉常平司職事入提刑司  
兼領編敕遂將提舉官合給之數撥與提刑司參詳修  
立而檢法官亦預焉詔依舊法政和八年臣僚言尚書  
省以縣令之選輕措置自不滿五千戶至滿萬戶遞增  
給職田一項夫天下圭租多寡不均久矣縣令所得亦

復不齊多至九百斛如淄州高苑八百斛如常之江陰  
六百斛常之宜興亦六百斛自是而降或四五百或三  
二百凡在河北東京西荊湖之間少則有至二三十  
斛者二廣福建有自來無圭租處川陝四路自守倖至  
簿尉又以一路歲入均給令固不得而獨有今欲一槩  
增給一項豈可得哉詔應縣令職田頃畝未及條格者  
催促標撥宣和九年詔諸路職官各有職田所以養廉  
也縣召客戶稅戶租佃分收災傷檢覆減放所以防貪

也諸縣多踰法抑都保正長及中上戶分佃認納不問所收厚薄使之必輸甚至不知田畝所在虛認租課聞之惻然應違法抑勒及詭名委保者以違詔論災傷檢放不盡者計贓以枉法論入己者以自盜論靖康元年詔諸路職田租存田亡者並與落租額紹興間懼其不均則詔諸路提刑司依法標撥官多田少即於隣近州縣通融須管數足又詔將空閑之田為他司官屬所占者撥以足之仍先自簿尉始其有無職田選人并親民

小使臣每員月支茶湯錢一十貫文內雖有職田每月不及十貫者皆與補足所以厚其養廉之利懼其病民則委通判縣令覈實除其不可力耕之田損其已定過多之額凡職租不許輒令保正催納或抑令折納見錢或無田平白監租或以虛數勒民代納或額外過數多取皆申嚴禁止之令察以監司坐以贓罪所以防其不廉之害罷廢未幾而復舊拘借未久而給還移充糶本轉收馬料旋復免行皆所以示優恩厲清操也若其項

畝多寡具有成式知藩府

謂三京潁昌京兆成都太原建康江陵延安興仁隆德開

德臨安府秦揚潭廣州

二十頃發運轉運使副總管副總管知節

鎮一十五頃知餘州及廣濟淮陽無為臨江廣德興國  
南康南安建昌邵武興化漢陽永康軍并路分鈐轄一  
十頃發運轉運判官提舉淮南兩浙江南荆湖東西河  
北路鹽事官通判藩府八頃知餘軍及監并通判節鎮  
州鈐轄安撫副使都監路分都監將官發運司幹辦公  
事七頃通判餘州及軍滿萬戶縣令六頃藩府判官錄

事參軍州學教授

並謂承務郎以上者

都監發運轉運司主管文

字滿五千戶縣令副將官節鎮判官錄事參軍州學教

授

並謂承務郎以上者

轉運司主管帳司不滿五千戶縣令滿萬

戶縣丞餘州都監走馬承受公事主管機宜文字同巡

檢都大巡河提點馬監四項節度掌書記觀察支使藩

府及節鎮推官巡檢縣鎮砦都監砦主巡捉私茶鹽駐

泊捉賊在城監當餘州判官學教授並謂承務郎以上

者軍監都監三項五十畝軍監判官餘州推官餘州及

軍監錄事參軍巡檢縣鎮砦都監砦主巡捉私茶鹽駐

泊捉賊在城監當藩府及節鎮曹官州學教授

謂承直郎以下

滿五千戶縣丞滿萬戶縣簿尉巡轄馬遞鋪縣鎮砦監

當及監堰三項

餘州及軍監曹官州學教授

謂承直郎以下

滿五千戶縣丞滿五千戶縣簿尉巡轄馬遞鋪縣鎮砦

監當及監堰二項五十畝不滿五千戶縣簿尉巡轄馬

遞鋪縣鎮砦監當及監堰二項

宋史卷一百七十二